

## HEFT PEYKER-İ BEHİŞTÎ

- 1 Yâ Rab eyle dile feyzünü müdâm  
Kim olur feyzün ile nagz-ı kelâm
- 2 Olmasa feyzün eli fâyiz-i cûd  
Gelmez idi bir avuç hâke vücûd
- 3 Bâg-ı lutfun eseri heşt-behişt  
Nâr-ı kahrun şereri dûzah-ı zîşt
- 4 Kudretün dest idüp hâki hamîr  
Sîneyi itdi şeh-i ‘aşka serîr
- 5 Ol mekîn ile şeref buldı mekân  
Toldı şevkunla zemîn ile zamân
- 6 Toludur ‘aşkun ile ins ü melek  
Hâk-i vecd oldu vü çarh urdı felek
- 7 Cism-i mahlûka olur ‘aşk revân  
Zindedür anun ile cümle cihân
- 8 Zinde kıl ‘aşkun ile mürde dili  
Zinde itdün virüben cân çü gili
- 9 Zinde-ten mürde-dil eyleme beni  
Mahv kıl benligi pür eyle seni
- 10 Kadri olmaz çü tehî ola sebû  
Şeref ü kadr virür kûzeye su
- 11 Olmaya kîsede çün sîm ile zer  
Eylemez kimse göz ucıyla nazar
- 12 Ey hired-zât-ı hayâlinde zelîl  
Vasfunı eyleyimez kâl ile kîl
- 13 Bilmede çün seni ‘acz oldu kemâl  
Ma’nîde oldu tekavvül bu mekâl
- 14 Mâ-’arefnâke didi çünki resûl  
Da’vî-i ‘ilm kılan ola cehûl
- 15 Bilmeyen aslı ile aslı neden  
Hakk’ı bildüm dise olmaya hasen

- 16 Yok nişânı ki beşer vire nişân  
Kendüyi kendü bilür neyse hemân
- 17 İtmese lutf eli ref'-i nikâb  
'Akl hergiz ide mi keşf-i hicâb
- 18 Görmede 'âciz anı çeşm-i nazar  
Göre mi degme belâ ile basar
- 19 'Akl dahı çün olur kendü hicâb  
Sırrını keşf ide mi 'ilm-i kitâb
- 20 Çün hired mûsıl-ı matlûb degül  
Reh-ber idinen olur anı hacil
- 21 Dâmen-ı fazla yapıs mûsıl olur  
Dest-res bulan ana yâri bulur
- 22 Keremi bedreka-i râh yeter  
Ola mı vâsita 'uşşâka nazar
- 23 Vay ana kim vire evhâm-ı zılâl  
Gele ma'kûli hayâline hayâl
- 24 Bâtılı hak bile ısrâr ola  
Gelmeye nakl u delîl ile yola
- 25 Tolu havf ile İlâhi bu tarîk  
Eyle lutfunı Behiştî'ye refîk
- 26 Pîşvâsı ola tâ 'ilm ü şühûd  
Kalmaya siflede eyleye su'ûd

DER-ERÂDİF-İ TESMİYE TAHMİD-İ  
FATİHÂTÜ'L-KİTÂB Kİ FÂTİHÜ'L-EBVÂB-EST

- 27 Ni'met-i Hak mezîd itdi sipâs  
Vâcib ol her nefese şükr ide nâs
- 28 Her mesâma açuben şükre-dehân  
Olsa her bir ser-i mû ana zebân
- 29 Bulsa bin haşr kadar ba'd-ı zamân  
Kârını şükre kosa kişi hemân
- 30 Bir nefes almaga olmaya sipâs  
Ana lâyıık nice şükr eyliye nâs

- 31 Ey olan ni'meti su gibi sebîl  
Keremi her kiři rızkına kefil
- 32 Ni'metün 'add ide mi hiç ahad  
Müntehî olmayana ola mı had
- 33 Ni'mete gerçi ki çok şart u sebeb  
Gâh olur mûcib olur sa'y ü taleb
- 34 Geh felek 'illet olur gâh zemîn  
Sebebi ma'nîde Hak oldu hemîn
- 35 Kapusı mahzeninün oldu küşâd  
Gerek oldukça alur hisse 'ibâd
- 36 Ne 'atâsına şerîk olur ahad  
Ne kapusından ider kimsey i red
- 37 Mahzen-i rızkına anbâr-ı Hudâ  
İsteme derbeder anı çü gedâ
- 38 Kirme seng içre virür hissa müdâm  
Âdeme rızkını virmez mi temâm
- 39 Feyz bahrinde sipihr oldu habâb  
Süfre-i hânına Cibrîl zübâb
- 40 Levh-i mahfûz ile yogidi kalem  
Rızk-ı mahlûkının olmuşdı rakam
- 41 Rızka olsaydı eger iki kefil  
Niçeler cû'dan olurdu 'alîl
- 42 Vahdeti her kiřiye oldu 'ayân  
İtdi Bürhân-ı Temânü'de beyân
- 43 Halkınun vahdete her biri güvâh  
Vay ana baglaya çeşmini İlâh
- 44 Şükr kim virdi bize 'akl u nazar  
Bilünür anun ila hayr ile şer
- 45 Ekseri hikmetinün oldu 'ayân  
'Âlem-i gaybı durur gizlü hemân
- 46 Ana kim zarf degül kevn ü mekân  
İtdi mir'ât-ı dil içinde nihân

- 47 Dâne-i hurd ile sıgmak bu cihân  
Nazar-ı ‘akla virür gerçi gümân
- 48 Lîkin istediği ‘ilmini mühît  
Cümle ma’lûm mürekkeble basît
- 49 Hâdim oldu nazarı ‘akla havâs  
Ki havâs ile olur kudret-i nâs
- 50 Çün zamân ile gide ‘akl u havâs  
Cân ‘urûc ide vü hâk ola libâs
- 51 Rûha ihsan ide bir dürlü havâs  
‘Akl ola her biri bunlara kıyâs
- 52 Matlaba ‘akl degül gerçi delîl  
‘Akl olmayan olur lîk zelîl
- 53 Câzibe olmaz ise rehber-i dil  
Fark olunmaz bir olur bes dil ü gil
- 54 Zerrece câzibe olmazsa eger  
Vâsıl olmaya visâlüne beşer
- 55 Cezbe-i ‘aşk ile mest it dili sen  
Mestdür câm-ı gurûr ile igen

NA’T-I MÎHTERÎ KÜ İCMÂL-İ EŞYÂ  
TAFSİL-İ HAKÎKAT-İ ÜST

- 56 Tûtî-ı nâtika-i nagme-serâ  
Hatm idüp zemzem-i medh ü senâ
- 57 Enbiyâ hâteminün na’tine bes  
Eyledi bin dil ü cân ile heves
- 58 Hâdi-i halk u İmâmü’s-sakaleyn  
Oldı ‘âlem ki vücûdıyla zeyn
- 59 Nokta-i evvel ü hem âhir-i hat  
Muzmahîl dâyiresinde bu nukat
- 60 Gül-i hoş-bûy-ı gülistân-ı İrem  
Veter-i dâ’ire-i kavs-ı kadem
- 61 ‘İllet-i gâyi-i îcâd-ı vücûd  
Zâtınun tâbi’-i nâ-bûd ile bûd

- 62 Âyet-i evvel-i pîşîne-rakam  
İbtidâ harf ki sebt itdi kalem
- 63 Muslih-i halk u safâ-bahş-i rüsûl  
Sâyiri cüz gibidür hazret-i gül
- 64 Âdem andan görünür gerçi kadîm  
Sebkine şâhid anun lîk delîm
- 65 Rûh olan kâlbüd-i Âdem'e ol  
Gün gibi nûr viren 'âleme ol
- 66 'Arakı mâye-i gül-berg-i tarî  
Nûr-ı mâ-zâg idi kühl-i basarî
- 67 İsmidür zikr-i sarir-i kalemün  
Zîver ü ziynet-i bâl-ı 'alemün
- 68 Çetr idi farkınun üstünde sehâb  
İtmeye hüsnini âzürde kitâb
- 69 Sâye salmaz yire ol serv-i revân  
Sâye-dâr ola mı ten gibi revân
- 70 Levh-i mahfûz ana olmuşdı 'ayân  
İşidürdi ne dise gizlü zebân
- 71 Teni olmuş idi ayîne-misâl  
Görinür idi ne vehm itse hayâl
- 72 İdüp engüşt-i elfiyle dünûn  
Kadrini nân-ı mehûn kıldı fûrûn
- 73 Söyledi dest-i şerîfnde hacir  
Yüridi gel diyü emr itdi şecer
- 74 Eyledi çünkü dirahte çü nazar  
Virdi tâze oluben berk ü semer
- 75 Barmagundan akıdup âb-ı hayât  
Virdi teşne-dil olanlara necât
- 76 Dön diyüp çün gûne emr itdi resûl  
Döndi yerine idüp emr-i kabûl
- 77 'Arz idicek ana hâlini cemel  
Kıldı müşküllerini lutf ile hal

- 78 Virdi Hak hâr-ı mugaylana lisân  
Eyledi mürsel idüğini beyân
- 79 Kısra'nun kasrını kesr eyliyen ol  
Nerdübânsız bulan ol Sidre'ye yol
- 80 Meş'al-i evvel idi şem'-i pesîn  
Mihr-i 'irfân idi vü mâh-ı metîn
- 81 Olmuş idi bir ana zâhir ü gayb  
Sâdiku'l-kavl sözi bî-şekk ü reyb
- 82 Enbiyâ mefhari vü tâc-ı rüsûl  
Himmeti bedrekası hâdi-i pül
- 83 Nice diyemem ana âb-ı hayât  
Kim irişmez yolına anı memât
- 84 Hâtem-i hâtime-i ehl-i belâg  
Mihrdür hazreti gayrısı çerâg
- 85 'Âlim olanlara ol 'ilm-i fezây  
Câhil olanlara ol râh- nümây
- 86 Yüz sürer pâyine Cibrîl-i Emîn  
Fakr idi fahri onun lîk hemîn
- 87 Âsumânun idüben tahtına şâh  
Kıldı Hak başına Levlâk-i külâh
- 88 Şer'-i şemşîri ile buldı cihân  
Cennet-i 'Adn gibi emn ü emân
- 89 Kadrini bilmede hayretde beşer  
İdemez fikr-i dakîkıyla nazar
- 90 Enbiyâ müftisi kâzi-i enâm  
Hikmeti gör dinür ümmî ana nâm
- 91 Oldı bir hatve ana arş-ı Hudâ  
Nerdübân pâyeleri sakf-ı semâ
- 92 Mahzen-i ma'rifete kufl u emîn  
Kamer-i çarh-berin mahzar-ı zemîn
- 93 Râmdur emrine mülk ü melekût  
Zeyni zâtıyla bâg-ı Ceberût

- 94 Çokdurur mu'cizesi lîk 'acîb  
Budurur eyleyicek fikr-i lebîb
- 95 Bir gice eyledi 'azm-i melekût  
Ola cevlângehi tâ kim Ceberût
- 96 'Arş u kürsi vü eflâk temâm  
Anı seyr eyledi sür'atle imâm
- 97 Kıldı bir anda 'urûcıyla nüzûl  
Bisteri germ idi geldikde Resûl
- 98 Geldi lutfiyıla çü Sultân-ı kerem  
Rahmet itdi hedâya-yı ümem
- 99 Çâr-yârı oluben gevher-i çâr  
Her biri dîn evine oldı cidâr
- 100 Yâr-ı gârı biri Bû Bekr-i Sıddîk  
Sâni isneyn-i mezelli vü şefîk
- 101 'Adl ü dâda biri menba' vü kân  
Yüz sürer idi işigine Kiyân
- 102 Biri 'Osmân idi deryâ-yı hayâ  
Câmi'-i menzil idi yemm-i vefâ
- 103 Biri dahı esedu'llâh -ı velî  
Evliyâ serveri ya'ni ki 'Alî
- 104 Oldı her biri yem-i kurbde güm  
Râdiyâ'llâh u Te'âlâ 'anhüm
- 105 Âl-ı ashâba ta'assub iden er  
Görmeye rahmet-i Rahmândan eser
- 106 Yâ İlâhi olıcak vakt-i kıyâm  
Bunları eyle Behiştî'ye imâm
- 107 Eyleyüp anlara cennetde karîn  
Eyleme düzah-ı firkatde hazîn
- ZİKR-İ MEHÂMİD-İ HALİFE-İ ZAMÂN  
MÛCİBİ-İ EMN Ü EMÂN
- 108 Ey cihân memleket-i pâdişehî  
Sedd-i İslâm u şerî'at-ı nehî

- 109 Hâmi-i dâyire-i milket-i Rûm  
Vâzı'-ı sünnet ü mâhî-i rüsûm
- 110 Sürme-i ehl-i nazar hâk-i derûn  
Tavk-ı sultânlara bend-i kemerûn
- 111 'Adlûn ile bulalı zeyn zamân  
Her harâb oldu mu'azzez çü cinân
- 112 Oldı pür-'âleme ber-vech ile dâd  
Dâd lafzın unudur âdemi-zâd
- 113 Olıcak ebr-i kefûn lûlû-feşân  
Pür olur hokka-i dür gibi cihân
- 114 Sîm ü zer eyleyesin çünki nisâr  
Kîse gibi pür olur heft diyâr
- 115 Nesi var Hâtem'ün ihsân n'ola  
Ki sana benzeye itdükde sehâ
- 116 Bezl kılmakda la'l ile zer  
Kan-ı deryâyâ mı benzeye beşer
- 117 Gerçi her gün pür olur lâl-feşân  
Göricek cûdun ider şermî nihân
- 118 Âsumân-ı hatem olur mihr-i nigîn  
K'ola destünde semâ ile zemîn
- 119 Sana çetr olmaga ey 'âli-cenâb  
Çerhûn etrâfına gün saldı tınâb
- 120 Çün hilâl alsun ele hançer-i tîz  
Tîg-ı hûrşîd idemez sana sitîz
- 121 Tâc-dih-i tâc-sitân mülk-güşây  
Fikri mir'ât-i felek müşterî-rây
- 122 Mâhveş râyet-i hurşîde karîn  
'Arş olur nûrî ele ferş-i zemîn
- 123 Perçem-i tûgı ne tâvûs-ı cinân  
Cilvede dâyim olur müşg-feşân
- 124 Mihr ile mehden alur remhi külâh  
Âsumân-gîr idi rif'atda çü mâh



- 125 Cengde çün ele ol şeh ala yâ  
Eylemez tir-i kâza gibi hatâ
- 126 Mihrveş çünki çeke hışm ile tîg  
Çâk ola vehmi ile zümre-i mîg
- 127 Siper olmaz ele gürz alsa cidâr  
Nûk-ı peykân ider âhına kâr
- 128 Bâl-ı Cibrîl olur ol şâha siper  
İtmeye tîr kadar tâ ki zarar
- 129 Benzemez nâhunına harbe-i berk  
Nice vehm eylesün garb ile şark
- 130 Rûzgâr eblâkını eyledi râm  
Tevsen-i çarha takar kadri licâm
- 131 Her seher her şeb idüp kûs-ı nidâ  
Emn-i emâna ider halka salâ
- 132 Devlet-i şem'ine pervâne kamer  
Bagladı hîdmet-i Cevzâya kemer
- 133 Şâhı-ı bî-dâr dil ü 'âlî-cenâb  
'Adl oldu ki fîten çeşmine hâb
- 134 Kurretü'l- 'aynî kamu 'âlemün ol  
Dürretü't-tâcî benî-âdemün ol
- 135 Zeyl-i çetri oluben halka penâh  
Sâyesine irişen geydi külâh
- 136 Mâh-ı nev olduğu bu terk-i külâh  
Zamm ide anı külâhına ki şâh
- 137 Sûreti sîreti benzer melege  
Bâbınun rif'ati döndi felege
- 138 'Aleme kutb durur emne medâr  
Kutbveş devlet ile tuta karar
- 139 Pâdişehler oluben ana gulâm  
Haşre dek şâh ola dünyâyâ temâm
- 140 Bâbına bende ola feth u zafer  
Bula zâtıyla şeref tâc u kemer

- 141 Devleti mihrine ırmeye zevâl  
Dâyimâ şâd ola görmiye melâl

SEBEB-İ NAZM-I KİTÂB-I MÜŞĞİN -NİKÂB Ü  
MAHMİDET-İ MÜNŞÎ-İ HİTÂB-I MÜSTETÂB

- 142) Subh-dem hâtif-ı gayb itdi hitâb  
Didi sür'atle geçer vakt-i şebâb
- 143) Gâfil olma ki geçer 'ömr çü bâd  
Gelmede gıtmededür âdemî-zâd
- 144) Bahr-i emvâc gibi halk geçer  
Görinür nesne yok illâ ki eser
- 145) Eser oldur ki ola anda sebât  
Nâm-ı zinde ide çün âb-ı hayât
- 146) Nedür ol sâbit eser nazm-ı latîf  
Kim olur anun ile nâm-ı şerîf
- 147) Haşre dek zindedür ol kim koya nâm  
Mürde dür zinde ise dahı 'avâm
- 148) Rûmda sencileyin nâm u nişân  
Komadı kimse turaldan bu cihân
- 149) 'Âleme mihr ideli 'arz-ı cemâl  
Dogmadı sencileyin ehl-i kemâl
- 150) Penc genci çü nasîb itdi İlâh  
Bende-i efkâr idün eyledi şâh
- 151) Sa'y kıl kılmaga sen anı temâm  
Ki sühan mülki ola hükmüne râm
- 152) Hamse hams olmag ile kadr bulur  
Bu temâm olmayıcak nâkıs olur
- 153) Hamse bununla olur çünki temâm  
İhtimâm it buna kıl nevmî harâm
- 154) Gencdür sinen ü miftâh-ı kalem  
Eyle envâ'-i kemâlât rakam
- 155) Tîşedür hâme vü kân oldu devât  
Sîm ü zer yirine bezl eyle nebât

- 156) Ney şeker hâme midâd oldu şeker  
Kand ile ko ki dola bahr ile ber
- 157) Sadeş oldu dilün ma'ni güher  
Pâkini nazm kıl oldur ki hüner
- 158) Baş çeküp hırkaya gavvâs misâl  
Gavta kıl bahr-ı dile dürlerin al
- 159) Ol cevâhirleri kıl halka nisâr  
Ki sadeş gibi pür ola bu diyâr
- 160) Eyle bir sihr gören ehl-i füsûn  
Zevk u şevkindan ola tâ ki hebûn
- 161) Şu'bede-bâzlık it yine ki halk  
Penc Genc idüğini bile bu delk
- 162) Göstere her biri bir dürlü cemâl  
'Arz ide her biri bir dürlü kemâl
- 163) Bâbilîler görüp insâf ideler  
Bileler var ki kerâmetden eser
- 164) Hum-ı 'aşk oldu devâtun dolu meyi  
Hem sarîr-i kalemün nâle-i neyi
- 165) Rûh-bahş oldu kelâmun çü Mesîh  
Gelmedi sana bedel ehl ü fasîh
- 166) Şeker-i nazmuna girüp meges  
Nahl-i Meryem misin ey 'Îsâ -nefes
- 167) Nûk-i hâmun çün ide bâng ü sarîr  
Murg-i cennet ötinür ki ide safîr
- 168) Penc Gence uralı pençeyi sen  
Her kişı sana didi pençe-şiken
- 169) Urdun ise kemerine kimün el  
Bendeveş hıdmetüne bağladı bel
- 170) İtmesün kimsene destine ta'ab  
Disün el arkası yerde sana heb
- 171) Eyledüm çünki bu efsâneye gûş  
Kıldı deryâ-yı ma'âni yine cûş

- 172) Dil hazâyin gibi olmuş idi pür  
Bezl kıldum yine bu ‘âleme dür
- 173) Görüp ihsânımı tâ bahr ile kân  
Zer saçup olmayalar lûlü-feşân
- 174) İde her biri metâ’ını nihân  
Şerm idüp itmeye varını ‘ayân
- 175) Himmetümi idünüp bâl u perüm  
Sidreye uçmaga oldu nazarum
- 176) Himmetî ‘âli olan ‘âlî-güher  
Eylemez ‘âlem-i süfliye nazar
- 177) Perr-i Cembrâ’ıl olup bâl u perüm  
Müntehâya olacaktur seferüm
- 178) Ey Behiştî sana tevfiğ Hudâ  
Cümle kârunda ola râh-nümâ

MATLA’I- EFSÂNE-İ PÜR-EFSÛN  
BEHRÂM-I GÛR-I ŞÎR-İ ZÛR

- 179) Genc peymâ-yı hazâyîn-i Hudâ  
Hâme miftâhın idüp kufl güşâ
- 180) Açdı bu mahzeni bezl itdi güher  
Çü sadef toldı cihân içi durer
- 181) Yâd idicek geçen efsâneleri  
Didi bu resme virüben haberi
- 182) Yezdcürd eyledi çün terk-i külâh  
Oldı Behrâm ‘Acem mülkine şâh
- 183) Bagladı beline şâhâne kemer  
Buldı anunla şeref dîhim-i zer
- 184) Nevbetin nevbet ile çaldı zamân  
Oldı pür sıyt u sadâsıyla cihân
- 185) Oldı bâbında anun kûs-ı sipihr  
Zühr-i hünyâger ü deffâf idi mihr
- 186) Nâme ile buluban kadr-ı direm  
Hutbesi ile ider fahr ‘Acem

- 187) ‘Adl u dâdıyla bulup emn ü emân  
Sanasın huld-berîn oldu cihân
- 188) Gam gidüp toldı ‘Acem mülki ferâh  
Düşmeninde dahı kalmadı terah
- 189) Hâmi-i beyzâ ider bâzi küleng  
Beccesi gibi yalar gûrı peleng
- 190) İdüp âhû berre-i şîr ile sîr  
Dâyeveş besler idi mihr ile şîr
- 191) Görse bir bâmda bin yerde ciger  
Zegan itmez idi vehmi ile nazar
- 192) Ni’met ile toluban mülk-i Kiyân  
Döndi bakkâl dükkânına cihân
- 193) Çogidi şarkda gâyet de sitem  
Çekdi ol resm-i sitem üzre rakam
- 194) Var ise her ne kadar huşk-şecer  
Verdi devrinde anun tâze semer
- 195) Kâr-ı ‘âlem tutup anunla nizâm  
Cümle ser-keşler olur hükmüne râm
- 196) Kıldı sâyilleri ihsânı ganî  
Takdı zâlimlere ‘adlî reseni
- 197) Şâhlıkda yogidi ana hemâl  
Pehlivânlıkda hemîn Rüstem-i Zâl
- 198) Şâd olup hulkı ile halk-ı cihân  
Olur âsûde zemîn ile zamân
- 199) Rezm de alsa ele tîr ü kemân  
Pûr-ı Zâl isteye havfindan emân
- 200) Hasına salsa kaçan gürz-i girân  
Degmeden sâyesi virür idi cân
- 201) Kahrla Kaf’a eger ursa sinân  
Tafsiye döndüre zahmiyle hemân
- 202) Gürzini çekmede zahmet çeke pîl  
Nîzesi mi’at çün mi’at-i mîl

- 203) Düzilelden berü nâvek ile yâ  
Gelmedi ancılayın şast-güşâ
- 204) Bezm de keffi güher-rîzi sehâb  
Rezmde tîgi virür meh gibi tâb
- 205) Rezm ü bezmide işi seyr ü şikâr  
Bir nefes gün gibi tutmazdı karar
- 206) Bir idi neste ana gûr u neheng  
Tîgına döymez idi şîr ü peleng
- 207) Sayda uydurmaz idi yüz yele bâz  
Gayrdan gayruya yogidi niyâz
- 208) Sag u sâlim dilese itmege bend  
Gerden-i şîre salar bend-i kemend
- 209) Darb-ı desti soruyıp kürbe gibi  
İtdügin kürbeyi itmezdi sabi

ŞİKÂR-KERDEN-İ BEHRÂM-I NÂM-DÂR U  
KÜŞTEN-İ BEBR DER-ŞİKÂR

- 210) Turdı bir gün seherî şâh-ı cihân  
Kasd kıldı kim ola sayda revân
- 211) Çekdiler cenge bir dîv- nijâd  
Kim tozın görmez idi pûyede bâd
- 212) Rahş-ı Rüstem gibi yük çekmede cüst  
Cümle endâm-ı kemâlinde dürüst
- 213) Gerdeni kavs-ı kuzat idi hemân  
Çâr-per-i tîr idi çün ola revân
- 214) Adı Şeb-reng-i siyeh hem-çü sehâb  
Cüstü hamlede mânend-i şihâb
- 215) Sayda üstünden itmeseydi hadeng  
Tîr ile bile irüşür çü peleng
- 216) Âhına gark olıcak rûz-ı musâf  
Saf içinde görünür idi çü Kâf
- 217) Bindi Şeb-rengine ol şîr-i jiyân  
Aldı destine kemend-i-y-le kemân

- 218) Oldı serverler ile sayda revân  
Düşdiler deşte olup bâd-vezân
- 219) Cüst ü cû itdi irüp sayd-gehe  
Gösterir yirlü yirini sipehe
- 220) Halkaveş devr kılur deşt-i siyâh  
Kalmadı dâm u dâde kaçmaga râh
- 221) Oldı ol dâyireye şâh medâr  
Deşt çün hâne-i çîn itdi nigâr
- 222) Mürde peykerler ile toldı zemîn  
Nat’-ı Çîniye döner deşt hemîn
- 223) Bâb-zen itdi gözine gehi tîr  
Ki kemendiyle şikâr eyledi şîr
- 224) Gelse önine eger pîl-i demân  
Müştinî eyler idi gürz-i girân
- 225) Müştinün darbını çünkim yiye pîl  
Sürhabın yıkılup olurdı zelîl
- 226) Tîg-i vehminden anun şîr-i jiyân  
Gürbeveş mîşede olurdı nihân
- 227) Buldı ol deştden bir bebr-i ‘acîb  
Dîv-i vârun gibi gâyetde mehîb
- 228) Cüssede pîl idi vü pençede şîr  
Cevşeni çâk ider idi çü harîr
- 229) Kime ugradıysa kıldı helâk  
Cübbesin cevşenini eyledi çâk
- 230) Gözi fessâd çanagıydı hemîn  
Hârveş mûyi huşûnetde haşîn
- 231) Deşneyidi dişi çengâli çü tîg  
Hışm iderdi harekât eylese mîg
- 232) Kuyrugun deprücek hem çü neheng  
Sinecek yer bulamaz kühde peleng
- 233) Girünüp esneyüp açaydı dehân  
Külhen-i tenteye benzerdi hemân

- 234) Nicesi destün idüp çînini çâk  
Üstine çünki saça hışmile hâk
- 235) Göricek vehm kıla Rüstem-i Zâl  
Tîge el urmaga bulmaya mecâl
- 236) Gördi Behrâm anı çün saldı semend  
Diledi kim sala bu yanuna kemend
- 237) Varmadı esb-i ciger itdi sitem  
İndi tîg aldı ele şâh-ı ‘Acem
- 238) Sıçradı cüst ki şâhı ide çâk  
İtdi bir darb ile şâh anı helâk
- 239) Gördiler itdügini bu işi şâh  
Kıldılar çümle du’â mîr ü sipâh
- 240) Şâm irince idüben şöyle şikâr  
Geldi pes devlet ile mîr-i kûsâr

#### SIFAT-I BEZM-İ BEHRÂM BÂ-DİLÂ-RÂM-I GÜL-ENDÂM

- 241) Bir gün oldı katı bârân ile bâd  
Varmadı sayda şeh-i ‘âli-nijâd
- 242) ‘Azm-i bezm itdi vezin eyledi taht  
Hem-dem-i ‘izzet ü ikbâl ile baht
- 243) ‘Adeti olmuş idi bu iki kâr  
Meclis eylerdi çün itmeye şikâr
- 244) Kıldılar def’i havâsına haber  
Virdi her peri gelüp meclise fer
- 245) Düşinüp sefere ni’am oldı zelîl  
İtdiler şerbet ü su gibi sebîl
- 246) Toldı pes ‘âlet-i bezmiyle zemîn  
Aldı sazın ele her zümre-i çîn
- 247) Var idi bir sanem-i çeng-nüvâz  
Başdan ayaga teni işve vü nâz
- 248) Zümre âyin ü dilâ-râm-ı benâm  
Reşk iderdi göricek mâh-ı temâm



- 249) Bir Hıtâyî-sanem ü Çînî-nîjâd  
Görmemiş mislini kim âdemî-zâd
- 250) Mûcib-i şevkıdî evzâ'î kamu  
Ser-i mûyîdî dehânî belî mû
- 251) Dag urup lâleye hâl-i siyehî  
İtdî şermende ruh-ı mihr ü mehî
- 252) Fitne-ger gamzesi gammâz anun  
Pür-hayl turrası tinnâz anun
- 253) La'li çün bâde zenahdânı çü hâm  
Ola mı buncılayın bâde haram
- 254) Vesmesi fitne idi sürmesi nâz  
Bin dil alsa ana bir lahzada az
- 255) Hüsn evcinde mehi dikdi 'alem  
Nâhunı dürr idi engüşti kalem
- 256) Hâyil olmazdı ana pireheni  
Şîşe içinde gülâb idi teni
- 257) Serv-nâz idi boyu 'ömri dırâz  
Berk idi işvesi vü mîvesi nâz
- 258) Nâr- pistân idi vü sîb-i zekan  
Yâsemîn-sîne idi gonce-dehen
- 259) Zülfinün her hamı kullâb-ı kulûb  
Sözinün şehd-i şeker gibi 'uzub
- 260) Lebi hurmâsi virür hastaya cân  
Hokka-i la'li olur lûlû-feşân
- 261) Mâh idi cebhesi vü saçî sehâb  
Heves-engîz çü eyyâm-i şebâb
- 262) Ruh-ı gül-rengi virüp güllere reng  
Deheni itdi dil-i gonceyi teng
- 263) Gamzesi tîr idi vü kaşları yay  
Sine mi dil mi döyer bunlara hây
- 264) Ceşm-i mestânesi bî-mâr-ı humâr  
Gamzesi kâtil-i dil-dâde-i zâr

- 265) Oluben zülfi perîşân u dijem  
Pîc pîc idi olup yâllesi ham
- 266) Düzd-i dil idi saçınun reseni  
Mahbes-i cân idi câh-ı zekanı
- 267) Ansa saçıyla olur nâfe-feşân  
Toldı micmer gibi ‘ıtrıyla cihân
- 268) Gürzine tolaşur saçı çü mâr  
Mâr-gîr idi san ol şûh- nigar
- 269) Gûş-vârı virüben hüsn-i behâ  
Görinür mihr yanında çü sehâ
- 270) Leb-i şîrîni hemîn şeker ü şîr  
Nâzenîn cismi çü kâfurî hamîr
- 271) Şikemi hırmîni-gül idi hemân  
Câmdan virür idi nâfi nişân
- 272) Her regi rişte idi hâyili dür  
Şîşe idi teni ya hamr ile pür
- 273) Nideyüm her tarafı bâg-ı cinân  
Misli olmaya meger ‘aksi hemân
- 274) Pây-ı hınnâlu vü hınnâsı nigâr  
Lâle-zâr idi tehî pâ-yı çenâr
- 275) Başdan ayaga letâfetde ‘aceb  
Görse her kim ki dutar lerze-i teb
- 276) Dökilür söyleyicek kand u nebât  
Cân virür ölmüşe çün âb-ı hayât
- 277) Nâlveş inceyidi beli hemân  
Ana avîhte ol mâye-i cân
- 278) Şöyle nâz ile kuşanmışdı kuşak  
Zillete inmiş idi kûşesi çâk
- 279) Geldi bin şîve ile bezme çü mâh  
Buldı zeyn anun ile meclis-i şâh
- 280) Meh-likâlar tutup etrafına saf  
Kimi saz aldı ele kimisi def

- 281) Alup ol mâh-ârâya çü nücûm  
İtdiler her ne ise vaz' u rüsûm
- 282) Aldı çengini ele itdi enîn  
Seyledür câm idi ol zümre-i Cîn
- 283) Kaddi ham pîri idüp tâze cüvân  
'Aşk esrârını iletdi beyân
- 284) Ne kadar kim var ise râz-ı nihân  
Eyledi pîr ü cüvân halka 'âyân
- 285) Dutmasa dâmenin otar u veted  
Tutmaz idi anı şevkindan ahed
- 286) Duralı gâh idüben anı terâş  
İder idi ki enîn sîne-hırâş
- 287) Bükilüp iki kat olup iniler  
Dilde derdi var anun dahı meger
- 288) 'Aşkdan olmuşdı lâgar u zâr  
Sayılurdu regi mânend-i nevâr
- 289) Perdeden taşar kaçan itse figân  
Gûş-mâl eyler idi ehl-i hemân
- 290) Cildi bir pîş-rev ol nakş-ı garîb  
Mest olup vicde-dâr u şâh-ı lebîb
- 291) Nakşına renk virüp itdi edâ  
Rûh- bahş oldı her itdügi sadâ
- 292) Çaldı tasnifini bir resme dürüst  
Zührenün çengi olur reşk ile süst
- 293) Şevkle gâh u geh eyledügi âh  
Hâlet-i 'aşkına olurdu güvâh
- 294) Şâhı bir resmle kerem itdi nigâr  
Eyledi sîm u zerî bezme nisâr
- 295) Aldı sâkî ele memzûc ile câm  
Kıldı tâvûs-ı cinân gibi hırâm
- 296) İbtidâ şâha sunar câm-ı zeri  
Leb-i nukl ile virüp gül-şekeri

- 297) Ba'de devr ider ashâb temâm  
Sâki-i serv-kad u kebg-i hırâm
- 298) Gâh mâh aldı ele gâh hilâl  
Devr idüp eyler idi gunc-ı delâl
- 299) Gâh yâkûta geh elmâsa döner  
Sihilde kâmil idi sâki meger
- 300) Gâh pür olur idi gâh tehi  
Gözedürdi sanasın gökde mehi
- 301) Câm-ı zer-mest olup açıldı hemân  
İtdi memzûc dili sırr-ı nihân
- 302) Germ olur sanki tolu ahker olur  
Canlanur lûlesi bir ejder olur
- 303) Ejdehâ kâm döküp âb-ı hayât  
Zehr-i gam mürdesine virdi necât
- 304) Kebg ü dürrâc ile tolmuşdı simât  
İştihâ-germ virür kalbe neşât
- 305) Tâze tâze gelüben bezme kebâb  
Tolu tolu açılır oldu şarâb
- 306) Kim ki mert olsa şehensâh-ı cihân  
Gönderir meskenine anı hemân
- 307) Mest olan gitdi kalur şâh ile mâh  
Germ olup çekdi kenâra mehi şâh
- 308) Leb-i zevkında bulup lezzet-i cân  
Basdı bagrına anı şâh-ı cihân
- 309) Leb-i yâdına nice bir açâ pîl  
Oldı bâlini gül ü bisteri gîl
- 310) Subha dek sürdü anun zevkını şâh  
Çıkuben tahta seher geydi külâh
- 311) Yok cihânda çü bilür idi vefâ  
İşi 'işret idi her subh u mesâ

REFTEN-I BEHRÂM-İ NÂM-DÂR-I BE 'AZM-İ ŞİKÂR  
Ü KÜŞTE ŞODEN-İ EJDEHÂ-YI MEHİB  
DER DEST-İ SER-EFRÂZ-I NESİB

- 312) Bir gün itdi yine şeh ‘azm-i şikâr  
Oldı serverler ile sayda süvâr
- 313) Saydı için uyduruben yüz yele bâz  
Aldılar gâh kuzen u gehi kâz
- 314) Dest-i geşt eyler iken şâh-ı cihân  
Gûşına irdi enîn ile figân
- 315) Vardı geldüğü yire bâmg-i ‘acîb  
Gördi bir ejder-i hûn-rîz-i mehîb
- 316) Var dehânında ki bir tâze cüvân  
Yudmuş ol ejder ider âh u figân
- 317) Agzı içinde alup nısf-ı nihân  
Taşrada nısf dahı lîk ‘ayân
- 318) Yudmuş anı cübbe vü cevşen ile  
Belki kılıcı vü kalkanı bile
- 319) Tîg çekmiş ki ide ya’ni ki helâk  
Dem urup yudmuş ol anı çü megâk
- 320) Na’ra urdı göricek şâh-ı cihân  
Kodı agzından anı ani yılân
- 321) Kasd-ı şâh eyleyüp oldı çü revân  
Aldı ol şîr eline tîr ü kemân
- 322) Görmemiş idi dahı tîr ü kemân  
Bahr-ı Kulzüm gibi mevc urdı hemân
- 323) Her hamî kavs-ı kuzah idi hemîn  
Nefesi ile ider çâk -i zemîn
- 324) Tel idi başı dehânı çü megâk  
Heybeti zümre-i dîvî ide hâk
- 325) Zehr-i mîzâb idi dişi hemân  
Merg-i seyl-âbını eylerdi revân
- 326) Pul pul idi teni her fûls-i siper  
Ra’d okı atmaz idi ana zarar
- 327) Cismine pulları san cevşen idi  
Pür şerâre deheni külhen idi

- 328) Meş'ale idi iki gözi hemân  
Dûdede gâh nihân gâh 'ayân
- 329) Kaldırıp başın aç a çeşm çü mâr  
Gicede sanki yanar kûhda nâr
- 330) Eyledi desti demi ile megâk  
Gâve dek eyleyüben sînesi hâk
- 331) Saçdı şâh üstine od açdı dehân  
Tokunup itmedi amma ki ziyân
- 332) Kaldı şeh ateş içinde çü Halîl  
Sakladı lutfi ile lîk Celîl
- 333) İder otdan çü siyâvuş-güzer  
Gelmedi bir kılına dahı zarar
- 334) Urdu çok tîr ana sultân-ı cihân  
Kâr-ger olmadı kılmadı ziyân
- 335) Gördi kim cismine tîr itmedi kâr  
Gözedir çeşmini ol şîr-i şikâr
- 336) Kesmeler urdı onun hışmına şâh  
Ki cihân gözlerine oldu siyâh
- 337) Urdı yirden yire kendüyi yılân  
Şeh görüp aldı ele gürz-i girân
- 338) Gördi Şeb-rengini şeh varmada süst  
İndi atdan yürüdi ejdere cüst
- 339) Def'-i tiryâk süründiyidi hem  
Cismine ermiye tasamdan elem
- 340) Urdı şol denli ana gürz-i girân  
Seyl olup akdı ki magzı ile kan
- 341) Kaldı hayretde görüp anı sipâh  
Gelmedi Şeb-rengine bindi yine şâh
- 342) Leşkeri cümle idüp şâha du'â  
Didiler ola mübârek bu gazâ
- 343) Görmedük kimsede bu resme ciger  
Ejdehâlık budur ey ejder-i ner

- 344) Zahmlu server olup anda helâk  
Kazdılar defn için ol yerde megâk
- 345) Kıldılar çünkü namâzını sipâh  
Defn idüp türbe yapar üstine şâh
- 346) İtdiler genc gibi yirde nihân  
Şehre döndi yine Dârâ-yı- zamân
- 347) Gice gündüz işini ‘işret ider  
Kesret-i şurb virür mülke zarar
- 348) Avda Şeb-rengdi Behrâm’a enîs  
Avda dil-dâr idi hem-râz u celîs

REFTEN-İ BEHRÂM-I NÂM-DÂR VEŞİKÂR  
U KÜŞTEN-İ ŞİRÂN-I BÎ-ŞÜMÂR

- 349) Şâh-ı maşrık çıkuban tahta seher  
Saçdı germiyyet ile ‘âleme zer
- 350) İtdi dîvân şeh-i Dârâb-nijâd  
Vâris-i mülk-i Cem u pûr-ı Kubâd
- 351) Taht-ı Kâvûsa çıkup eyledi dâd  
Oldı ‘adli ile âsûde ‘ibâd
- 352) Pehlevânlar oluben yanına cem’  
Tutdılar lülü-yı şeh-vârına şem’
- 353) Yirlü yirine geçüp mîr ü vezîr  
Toldı dîvân içi bürnâ ile pîr
- 354) Dökülüp ni’met ü seyl oldı şarâb  
Bire büryân idi mûrg idi kebâb
- 355) Çünkü yenildi temâm oldı ni’am  
Halk hayfini sorar şâh-ı ‘Acem
- 356) Kime zulm oldı ise eyledi dâd  
Oldı her gussalu dâdı ile şâd
- 357) Bir bölük halk gelüp itdi figân  
Didiler dâd eyâ şâh-ı cihân
- 358) Şehrümüzi idüben şîr harâb  
Hiç bir kimsede kalmadı devâb

- 359) Bir neyistân var içi tolu esed  
Zühresi yok giçe yanından ahad
- 360) İkisi bir yire gelseydi eger  
‘Alemler eyler idi zîr ü zeber
- 361) Her biri cüssede bir pîli hemân  
Yâ musavver-ecel almakda revân
- 362) Şeh didi gam yemenüz dâd idelüm  
Kırup anları sizi şâd idelüm
- 363) Dâm-ı dûdan ideyim ‘âlemi bâc  
Kılayum sînelerin tîg ile çâk
- 364) Bindi pes atına fil-hâl dilîr  
Gûr yirine ki sayd eyleye şîr
- 365) Ol neyistânı varup gördi çü şâh  
Emr kıldı alur ortaya sipâh
- 366) Od yakar her kişi önünde ‘acîb  
Gelmiye yanına tâ şîr-i mehîb
- 367) Şîrdür otdan ider vehm ü hazer  
Geçüp eyleyimez insâna zarar
- 368) Âteşin halka olur çünkü sipâh  
Girdi ortaya medâr olmaga şâh
- 369) Urdılar çünkü yine âteş-i tîz  
Neysitândan ded ü dâm itdi gürîz
- 370) Her ne suya ki hücûm itse esed  
Geçmez âteş olur râhına sed
- 371) Kırdâşa bunları kassâb gibi  
Akdi kan her yana seyl-âb gibi
- 372) Oldılar mâde vü ner cümle helâk  
Oldı ol memleket anun ile pâk
- 373) Tîg ile şâh u hadeng ile sipâh  
Virmediler esede kaçmaga râh
- 374) Eyleyüp şâha re’âyâsı du’â  
Herkesi eyledi cân ile senâ



- 375) Âferîn didi sipihr üzre melek  
Egilür öpmege destini felek
- 376) Oldı bu feth ile her kişi ferah  
Kimsenün kalmadı kalbinde terah
- 377) Geldi şehre yine nûş eyledi mey  
Başladı yine terâne def ü ney
- 378) Yine çeng aldı ele Zühre-i çîn  
Yine ‘ûd eyledi feryâd u enîn
- 379) Yine zer-pâş oluben bezmde şâh  
Yine pür oldı zer uhk-i siyâh

‘AZM-İ HAKAN-I ÇÎN BE-KASD-I SAYD-I BEHRÂM U  
KÜŞTE-ŞODEN-İ DER DEST-İ PEHLEVÂN

- 380) Her kime kim ola ikbâl atı râm  
Eylesün kanda ki eylerse hırâm
- 381) ‘İzz ü devlet kişiye çün ola yâr  
Düşmeni olsa cihân halkına vâr
- 382) Uyumaz bahtı ol uyursa eger  
Zehr yirse olur agzında şeker
- 383) ‘Ayş olur işi şehün çünki müdâm  
‘Avk ider gâyet anı ceng ile câm
- 384) Gâh tefrît ü geh ifrât ider  
Şehligün şevketine virdi zarar
- 385) Didilerse ne kadar tutmadı söz  
Dökdüler mülkine a’dâları köz
- 386) Hâl-i Îrân bilüp şâh-ı Hıtây  
Kasd kıldı basa o milkete pây
- 387) Nâmeler gönderüben beglere şâh  
Emr ider encümen ola ki sipâh
- 388) Hiddetiyle çün olur cem’-i sipâh  
‘Azm-i rezm eyledi vü geydi külâh
- 389) Subh-dem kâr dem eyledi enîn  
Âsitânına gelür leşker-i Çîn

- 390) Cümle ‘âlem oluben cevşene gark  
Âhen olmuşdı tehî pây ile fark
- 391) Kurdılar pîl-i sepîd üzre serîr  
Çıkıdı oturdı emîrâne emîr
- 392) Şevketiyle çeküp Îrâna sipâh  
Merv yolını tutup yüridi şâh
- 393) ‘Âlemün içi tolup bâng ü derây  
Eyledi kulagı ger rûyına nây
- 394) At sahîbi ile âvâze-i nâs  
Çökerdürdi felegi şöyle ki tas
- 395) Virdi elvân ile envâ’-ı tırâz  
Hayl-i hâkâniye haylice birâz
- 396) Bahr idi seyl gibi lîk revân  
Seyl idi mevc velî gürz-i girân
- 397) Toluben ‘âlem içi Çinî sipâh  
Yir yüzün tutdı Tatar hem-çü giyâh
- 398) Her biri geydi nemed üzre zirih  
Tîrden kalmadı kalbinde girîh
- 399) Pür idi her birinün tirkeşi tîr  
Bir idi oklarına der’ u harîr
- 400) Girüden ‘âlemi tutmuşdı zulem  
Meş’ale oldı velî tâb-ı ‘âlem
- 401) Kondı har-gâhı nüzûl eyledi hân  
Sâkin oldı yine deryâ-yı revân
- 402) Her birisi nemedin çadır ider  
İtmeye tâ ki güneş tâbı zarar
- 403) Aldılar zeynlerini cümle hemân  
Gitdi her esb-i çerâ-gâhe çemân
- 404) Ne ‘alef virdi ne hod hayli gam var  
Otlayup her birisi tutdı kinâr
- 405) Kımız içdi kimi ezdi kimi keş  
Gâyet ulularınun yidügi leş

- 406) Bilmez idi ki biri neydüğünü nân  
Bildüğü at eti bâl idi hemân
- 407) Hân idüp bir iki gün anda karâr  
Leşkerin yokladı yok gördi şümâr
- 408) Rîk-i kuhsâre bulunırdı ‘aded  
Lîk ol hayili bilmezdi ahad
- 409) Gördiler cümle gidemez bu sipâh  
Gider ise bulamaz âb u giyâh
- 410) On bölük atdı sipâs-ı şeh-i Çîn  
Olmaya gark-ı muhîte ki zemîn
- 411) Kıldı her bölüğe bir serveri ser  
Virüben sîm u zer ü tâc u kemer
- 412) Didi ardımca gelün siz de hemîn  
Ola kîm feth ola Îrân-ı zemîn
- 413) Bagladı bu işe mecmû’-ı miyân  
Oldılar ‘azm idüben Merve revân
- 414) İrdi ser-hadde çü sultân-ı Hıtây  
Toldı Îrânın içi âh ile vây
- 415) Gârete başladı cumhûr-ı Tatar  
İtdiler nice yiri zîr u zeber
- 416) Şâh-ı Behrâm’a irişdi çü haber  
Ceng içün leşkerini hâzır ider
- 417) Bildügi gördüğü serverleri şâh  
Getürüp yanına gerd itdi sipâh
- 418) Kasd kıldı ide hasm-ı-yla neberd  
Mergine merg diye derdine derd
- 419) Didi destûr eyâ şâh-ı zamân  
Toludur hayl-i Hıtây ile cihân
- 420) Habeşi ile Tatar hayline had  
Komadı kimse idüp cümle ‘aded
- 421) Bunlara hasm olamaz hiç sipâh  
Bula hayliyle meger kimsene râh

- 422) Buldığı mâlî idüp bahş-ı sipâh  
Hoş-dil itdi sipehini yine şâh
- 423) Didi Hak bana olur ise mu'în  
Gûrveş ola zebûnum şeh-i Çîn
- 424) 'Avn-i Hakdan eger olmaya meded  
Bilürüm bana mu'în olmaz Ahad
- 425) İ'tikâdum bu velî leşker-i Çîn  
Desti bir dem göre çünkim geh kin
- 426) Vehm idüp eylemeye ceng ü cidâl  
Kaçmaga yüz tuta kalmaya kıtâl
- 427) Arkama çünki geyüp bebr-i beyân  
Rezm de alam ele tîr ü kemân
- 428) Kaçmaga döndüre yüz Rüstem-i Zâl  
Bulmaya benüm ile çünki mecâl
- 429) Bunı böyle dir iken şâh-ı cihân  
Rûmdan dahı gelür peyk-i revân
- 430) Didi 'asker virüben Kayser-i Rûm  
Eyledi mülket-i Îrâna hücûm
- 431) Bir sipeh kim dahı mıslını zamân  
Görmedi hulk olalı mülk-i cihân
- 432) Âhına gark oluben başdan ayak  
Kimi fâris sipehün kimi yayak
- 433) Heftelik yola gider bâng-i sahîl  
Toldı pes nat'-ı zemîn esb ile pîl
- 434) Yitmedügi içün anlara miyâh  
İtdi galbîr yerün yüzini câh
- 435) Nirde konsalar ey şâh-ı zemîn  
Nîzeden kûha döner deşt hemîn
- 436) Hayme vü har-geh ile toldı cihân  
Haymeler mevc-i sipeh bahr-i revân
- 437) İtdi gerdûn ile kendüye hisâr  
İtmeye tâ ki şeb-i hûn ana kâr

- 438) Tüfek u top ile zeyn oldı hisâr  
Yogidi reh ki sabâ ide güzâr
- 439) Gice bâl ahayıldı şeb-reh-i ger  
Bin tüfek eyler idi haste ciger
- 440) Harbe vü sih ile sûr itdi sipâh  
Kal'alar içre huzûr eyledi şâh
- 441) Arasında uçayum dise zübâb  
Sançılur harbelere hem-çü kebâb
- 442) Sende yok anda olan âlet-i harb  
Eyleme anun ile harb ile darb
- 443) Gaflet itdün idi şah-ı cihân  
Her taraftan sana hasm oldı 'ayân
- 444) Çün işitdi bu sözi şâh-ı 'Acem  
Eyledi anı ihâta hem ü gam
- 445) Gönli isterdi anun dahı kîtâl  
Hasm iki oldugına geldi melâl
- 446) Kankı suya ki olur ise revân  
Yol bulur bir yanadan düşmen-i cân
- 447) İki kürbe ide bir şîri zebûn  
İki mîve ide bir şâhı nigûn
- 448) İki yüz bin kişi cem' itdi temâm  
Her biri âfet ü hûni vü benâm
- 449) Kodı yüz elli binin şehr de şâh  
Hasmdan saklıya tâ tâht-ı sipâh
- 450) Bir begi var idi gâyetde dilîr  
Çarh olmaz ü siper itse ki tîr
- 451) Kardeşi oğlu idi fûrs-i benâm  
Tîz u hûn-pâş idi mânend-i hüsâm
- 452) Kıldı serverlere ol serveri ser  
Didi vehm itmege olur feth u zafer
- 453) Turunuz siz varayum Tebrîze ben  
Şâyed ola ki olam hasm-şiken

- 454) Ma'bedüm var kıluban anda namâz  
İdeyüm Hâlık'a 'acz ile niyâz
- 455) Size çünkim gele nezdik Tatar  
Gönderesüz şeh-i Tûrâna haber
- 456) Kaçdı Behrâm deyüp edâ idesiz  
İnkıyâd ile şehi şâd idesiz
- 457) Kim urup kılmaya Îrânı harâb  
Çünki eylemeye hışm-ı-y-la şitâb
- 458) Elli bin server ile oldu süvâr  
Her biri ma'nîde bir sâ'm-ı süvâr
- 459) İkişer yaylu atı iki şer  
Yükleri yayları şemşîr u teber
- 460) Göçüben eyledi Tebrîz'e sefer  
Kayser-i Rûm'a dahı oldu haber
- 461) Karşuladı sanuben Kayser-i Rûm  
Kodı kıldugını sür'atle hücûm
- 462) Başladı inmege gitmekde direng  
Ola âsûde şehe tâ ki ceng
- 463) Kayser eglendüğünü bildi çü şâh  
'Azm-i hakân idüben çekdi sipâh
- 464) Buldı bir bedreka-ı râh-nümâ  
'Alemler devr idici hem-çü sabâ
- 465) Şâh bir yoldan alup oldu revân  
Bilmeye vardugın üstine ki ân
- 466) Fûrs ider şeh gidicek elçi revân  
Gaflet eyleme sözi eyle ki ân
- 467) Gıybet eyledüğünü şâh-ı cihân  
Eyledi ilçi ile şâha 'ayân
- 468) Didi biz bendelerüz hazret-i hân  
Kulluga bizi kabûl itse hemân
- 469) Varayum hidmetine yüz süreyüm  
Şâhumuz oldu yüzini göreyüm

- 470) Nice olduğunu hıdmet göre şâh  
Kuluyam ben de vü hem cümle sipâh
- 471) Kendinündür kamu Îrân-zemîn  
Komasun yıkmaga haylini hemîn
- 472) Sîm ü zer nakd-ı cevâhir ne ki var  
Yolına hânun idem cümle nisâr
- 473) Cân u dilden kulı kurbanı bile  
Leşker incinmeye âheste gele
- 474) Karşular memleketün halkı şehi  
Hâzır oldı kamu Îrân sipehi
- 475) Varalum ‘izzet ü ikrâm idelüm  
‘Alemi hıdmetine râm idelüm
- 476) Aldanur ilçi sözine şeh-i Çîn  
Oturur memleket ucunda hemîn
- 477) Geh yeyüp gâh içüp eylerdi şikâr  
‘Ayş u ‘işretde idi leyl ü nehâr
- 478) Gice gündüz dimeyüp gitdi berây  
Hâna iletdi şehi râh- nümây
- 479) Gördiler kaldı yakîn hüsrev-i Çîn  
İtdi bir gûşeyi Behrâm kemîn
- 480) Ol gün asâyış idüp anda sipâh  
Olup âsûde gider rahmet-i râh
- 481) Şeb olur hâzır ider âlet-i ceng  
Bir nefes eylemedi dahı direng
- 482) İtmege hânı şebîhûn u hakîr  
Çaldılar tabl u nekkâr ile nefîr
- 483) Ol gice hikmet-i Gûr hüsrev-i Çîn  
Har-gehün itmiş idi huld-ı berîn
- 484) Çîn idüp begleri itmiş idi bezm  
‘Ayş u nûş idi anlamaz idi rezm
- 485) Yemek içmek idi lâfîdi güzâf  
Kımız u bâl içün idi çoğı lâf

- 486) Her biri yatdı olup mest ü harâb  
Evvelâ itdi şebîhûnı şarâb
- 487) Dâhı gâfil idüben anları hâb  
Hâbdan kalmadı bir kimsede tâb
- 488) Ba'dehu itdi şebîhûnı 'adû  
Tutdılar kaçmaga her birisi rû
- 489) Mest ü la-ya'kil idi hayl-i Hıtây  
Alamadılar ele tir ile yây
- 490) Ugradı har-geh-i hakâna çü şâh  
Almış ortaya görür mest-i sipâh
- 491) Atdan indi eline aldı hüsâm  
İtdi hâfızlarun işini temâm
- 492) Girdi har-geh içine şâh-ı zemîn  
Uyanur 'arbededen hüsrev-i Çîn
- 493) Gördi pür har-geh içi nâle vü vây  
Aldı tîgîn eline şâh-ı Hıtây
- 494) Hânı karşıladı Behrâm-ı dilîr  
Ceng ider biri biriyle iki şîr
- 495) Bir kılıç vurdı ana şâh-ı 'Acem  
Abanos iken olur taht-ı bekâm
- 496) İtdi ol zahm ile hâkânı zebûn  
Tahtdan düşdi yire zâr u nigûn
- 497) Virdi cân düşdügi gibi şeh-i Çîn  
Kaldı andan dahı Turân-ı zemîn
- 498) Günde bin şeh yir ola hâk-ı siyâh  
Göze görüneni amma ki giyâh
- 499) Olmada oldu müsâvî çü beşer  
Ne belâdur yâ bu tâcıyla kemer
- 500) İçirür her kişiye merg çü mül  
Kurı baş agrısıdur bâng-i dühül
- 501) Çün refîk olmaz imiş mâl ile câh  
Ol mîdur nef'ki artura günâh



- 502) Fikr ideydi kiři mevtini eger  
Saklamaz idi yıgıp sîm ile zer
- 503) Hâl-i ‘âlemden olan kimse haber  
Eylemez devlet-i aynaya nazar
- 504) Kiřide çün ola fi’l-cümle kemâl  
Görinür mi gözine mâl u menâl
- 505) Göz olur çün bir avuç hâk ile pür  
Nazarunda bir ola seng ile dür
- 506) İ’tibar oldu çü gaflet-i sebî  
Aldanan kimse olur ana sabî
- 507) İ’tibârât-ı tılısm itdi Hudâ  
Sanma gördüğünü tahkiki ola
- 508) Râki’at ise olur çünkü hayâl  
Pes hayâle ne için bunca melâl

ÇEŞEN-İ ŞÂH-I İRÂN-ZEMÎN VE NİHÂDEN-İ  
TÂC-I METÂ’-I BER-SER-BER-HÂKÂN-I ÇİN VE  
MERÂSİLE-İ CİHÂN-PEHLEVÂN BÂ-KAYSER-I ŞÂH-I RÛM

- 509) Kıldı hâkânun işin şeh çü temâm  
Kırmadı ‘askerini eyledi râm
- 510) Hânun olmuş idi bir oğlu esîr  
Yerine eyledi şâh anı emîr
- 511) Kuşadup tîg geyürdi ana tâc  
‘Ahd kıldı vire amma ki harâc
- 512) Cân u dilden oluben bende-i şâh  
Nîk-hâh oldu şehe cümle sipâh
- 513) Bunların sıdkına şeh itdi çü hazm  
Koyuben rezmi ider hân ile bezm
- 514) Yeyüp içüp çü çıkar başa şarâb  
Dost-kâmiler içer şeyh ile şâb
- 515) Yüz üzüp hân didi ey şâh-ı zemîn  
Bendelerden biri bil bizi hemîn
- 516) Ol Hudâ hakkı ki yaratdı cihân

- Nitekim ola vücûdumda revân
- 517) Yâr olam yâruna a'dâna 'adû  
İtmiyem hıdmetüne çîn-be-rû
- 518) Baş u cân yoluna cân ile fidâ  
Cümle kârunda ola yâr Hudâ
- 519) Bir muradum var eyâ şâh-ı cihân  
Diyeyüm hazretüne bâri 'ayân
- 520) Dilegüm olmaz ise bâri kabûl  
Cân u dilden oluram şâh-ı melûl
- 521) Yirde yatdukca şehâ hüsrev-i Çîn  
Ola Behrâm şeh-i rûy-ı zemîn
- 522) Bir kızı kaldı eyâ şâh-ı serîr  
Gelmedi gelmeyiser ana nazîr
- 523) Mihr-ruhsâredür ol mâh-cebîn  
Reşk ider görse yüzün sûret-i Çîn
- 524) Gamzesi tir ü kaşı cacı kemân  
İstikâmetde boyı nîze hemân
- 525) Çeşm-i bî-mârı çü nâz ile süzer  
'Alemün halkı olur haste ciger
- 526) Fitneger kaşını çün eyleye çîn  
Dil ider sîne-i vehm ile kemîn
- 527) Hareketde beli baykını müdâm  
Mürg-i dil saydına her bir kılı dâm
- 528) Sînesi âyîne-i gayb-nümâ  
Mihr-i mirâtına feyz ide safâ
- 529) Göricek sûretini reşk ide hûr  
Başdan ayaga teni gün gibi nûr
- 530) Boyı uzun beli ince teni nerm  
Görse yüzini melâyik ola germ
- 531) Kaşı gözi kara vü sînesi ak  
On ikisindedürür sinni de çâk
- 532) Agzı burnı uvacık kuh-ı serîn

Mûya benzer bili dikkatde hemîn

- 533) Utanur yüriyicek kebg-i deri  
Gizlenür andan idüp şerm peri
- 534) Nakşı gâyetde güzel adı Nigâr  
Cânda arâm komaz dilde karâr
- 535) Ol sanem cüft-i şeh olursa revâ  
Şehden artuk yok ana cüft-i sezâ
- 536) Mihr ider ölüm buyurur isen eger  
Olsun âmîhte şîr ile şeker
- 537) Çün Nigârün işidür vasfını şâh  
Germ olup suda ider mihre külâh
- 538) Didi çün bizi kabûl eyledi hân  
Râzıyam ben de nikâh eyle hemân
- 539) Vâliyidi çü nikâh eyledi şâh  
‘Akd-ı mihr eylediler mihr ile mâh
- 540) Kodu yası düğine başladı hân  
Şâdlığı ile tolar cümle cihân
- 541) Eyledi sûr-ı sürûr-ı-y-la herây  
Gûş-ger eyledi mугan ile nây
- 542) Çeşn işin çünki temâm eyledi şâh  
Oldı hem-hâbe şehenşâh ile mâh
- 543) Gördi şeh bir sanem-i lâle-’izâr  
Vâkı’â ismi gibi resm-i nigâr
- 544) Göricek bin dil ü cânıyla sever  
‘Aşk gönlinde şehün eyledi yer
- 545) Bir iki gün sürüp anun ile dem  
Döndi mülkine yine şâh-ı ‘Acem
- 546) Şâha bedrûd idüben hüsrev-i Çîn  
Geldi Çîne dil-i düşmenden emîn
- 547) Geyüben başına Behrâmî külâh  
Oldı Hâkân yerine mülkine Şâh
- 548) Vardı istahra şehenşeh dahı şâd

- Rûz u şeb hem-demi ol hûr-nijâd
- 549) Vardı çün tahtına sultân-ı ‘Acem  
Emr ider mûr-bed alur deste kalem
- 550) Yazmaga Kaysere mektûb-ı debîr  
Eyledi müşk ile âlûde harîr
- 551) Evvelâ yazanı ki evveli yok  
Bî-nihâyet keremi ni’meti çok
- 552) Hâlık-ı hulkdürür ferd ü samed  
İdemez nisbet ana kimse veled
- 553) Her kime virdiyise fazlı vücûd  
Farzdur kim ana eyleye sücûd
- 554) Nâmiyâ oldı çün ol ism-i berâz  
Başdan ayaga olur nâme-tırâz
- 555) Vasf idemez şeref-i ismini nâz  
Şeref-i zâtını kıl ana kıyâs
- 556) Keremi vâsıta-i halk-i vücûd  
Eser-i lutf-ı bû nâ-bûd ile bûd
- 557) Âdemî-zâde viren ‘akl u kemâl  
‘İzz ü ikrâm u kerâmât ü celâl
- 558) Hâzini olamadı çarh u zemîn  
Âdemi eyledi gencîne emîn
- 559) Ba’dehu Kaysere pes itdi selâm  
Kıldı ta’zîm ile tekrîmi temâm
- 560) Didi ey pâdişeh-i nîk-nijâd  
Zâtına lâzım olan dâniş ü dâd
- 561) Neyledim ni’tdüm ola bari sana  
Ki ‘adâvet idesin şöyle bana
- 562) Sana bir kimse ki kılmaya zarar  
Baglama kasdına kîn ile kemer
- 563) Eyleme kendüne ahab-ı ‘adû  
Dâyima sag gelür sanma sebû
- 564) Yiyebildüğün aşâ uzada el

İdebildigün işe baglaya bel

- 565) Lokma kim olmaya hazm anı yeme  
Ki kılur semm gibi muhtâc-ı seme
- 566) Çün nefes yolını sedd eyliye nâm  
Şübhesüz sür'at ider çıkmaga cân
- 567) Beni bilmez misin ey Kayser-i Rûm  
Eyledün bana ne cân ile hücûm
- 568) Kurt konşısını yemez çü şehâ  
Bize kasd eylemek ola mı revâ
- 569) Konşıyı konşıya sorar çün İlâh  
Bizi âzürde niçün eyleye şâh
- 570) Eyledün çünki ta'âruz bu kadar  
Gâfil olma irüşür sana zarar
- 571) Bana virmek gerek elbette harâc  
Yoksa vâllâh gider taht ile tâc
- 572) Cenge çünkim çeke bir şâh-ı sipâh  
Havf idüp dönse gider genc ü külâh
- 573) Pây-ı mâl olup olur hasma zebûn  
Şehler içinde olur bast-ı nigûn
- 574) Varıcak dönme dinür var bu mesel  
Eyle sen dahı nasîhatle 'amel
- 575) Berü gel eyleyelüm ceng ü cidâl  
Göresin niçe olur sen de kîtâl
- 576) Gırre olma sipeh-i gence şehâ  
Çün gele nusret olur cümle hebâ
- 577) Cizye girü virmezsen ceng iderüm  
'Alemi gözlerüne teng iderüm
- 578) Hâzır ol kim çekerüm ben de sipâh  
Geyüben başuma pûlad külâh
- 579) Çün idem hınkumı meydânda cümân  
Divşüre Rüstem ise hasm gümân
- 580) Çün idem nîzeyi mîzâb-ı demâ

Siperin ditrede vehmiyle semâ

- 581) Kankı server ki bana egmeye baş  
Başı ucında diker dehr eli taş
- 582) Şîrlerden niçe aldugumı tâc  
Halk-ı ‘âlem bana virdüğünü bâc
- 583) İşidüpdür bilürem şâh-ı cihân  
İtmesün oda çü pervâne revân
- 584) Eyledi bana husûmet şeh-i Çîn  
Hâlin işitdük eyâ şâh-ı zemîn
- 585) Sen bana gelmez isen ben varayum  
Turabilür mi sipâhun göreyüm
- 586) Hasmun idem çü reyâhına nazar  
Görinür bana Hudâ hakkı eber
- 587) Ne kadar çokluk olur ise sipâh  
Görinür gözlerüne hem-çü giyâh
- 588) Tîgıma cümle cihân halkı zebûn  
Gam yok olursa ‘adû hayli füzûn
- 589) Mülkine varur isen sag u esen  
Bilesin bilmedün ise beni sen
- 590) Nâmeyi öyle diyüp itdi temâm  
Ve’s-selâm ile ana itdi hitâm
- 591) Buldı bir ehl-i dil ü mîr-i kelâm  
Nâmeyi virdi şehe itdi selâm
- 592) Didi var bana getür togrı haber  
Ya kîtâl eyleyelüm ya vire zer
- 593) Nâmeyi aldı resûl oldu revân  
Hazret-i Kaysere irişdi demân
- 594) Yüz urup şâha du’â itdi resûl  
Göricek nâmesini oldu melûl
- 595) Bildi Behrâm ile ger eyliye ceng  
Rûm mülkini ider çeşmine teng
- 596) Şeh-i Çîn ana ki olmaya hemâl

Hasm anunla bula mı çünki mecâl

- 597) Çâresi sulh-ı derây şâh-ı hemîn  
Başa çıkmaz ana her kim ide kîn
- 598) Virüp ilçisine çok sîm ile zer  
‘İzz ü ikrâm u ri’âyetler ider
- 599) Bir kızı var idi hûrşîd-i zemîn  
Müşteri-tal’at-u nâmıydı çîn
- 600) Kaddi Tûbâ idi ruhsârı cinân  
Kevser idi leb-i mey-gunî hemân
- 601) Kasd ider kim anı Behrâma vire  
Ta ki gönline anun ile gire
- 602) İdine kendiye dâmâd anı şâh  
Telef olmaya ara yirde sipâh
- 603) Hasmina hasm ola vü yârına yâr  
Biri biriyle ide ‘ahd u karâr
- 604) Beglere söyledi tedbîrini şâh  
Maslahat gördi bu râyını sipâh
- 605) Koşdı ilçisine destûrını şâh  
Virdi çok sîm u zer u taht u külâh
- 606) Meh-likâya virüben hayli cihâz  
Bile gönderdi vü ‘arz itdi niyâz
- 607) Gerd-i gerdûne çün ol mâh-likâ  
Gördi reşk eyledi gerdûn-ı semâ
- 608) Kadr buldı meh ile hem-çü felek  
Sâyebân itdi cenâh ana melek
- 609) Anı zeyn itmişdi kırmızı sîb  
Çarh-ı atlas gibi bulmuşıdı zîb
- 610) Çeküben tevsen-ı gerdûn-hırâm  
Seyr ider sür’at ile Dârü’s-selâm
- 611) Aldı oraya anı Rûmî sipâh  
Hûblar hâle arasında o mâh
- 612) Oldı mihire çü gerdûn-ı makâm

Halka gösterdi makâmât-ı temâm

- 613) Düzdü her çarh-ı ber-avâzeye sâz  
Keşf olur ‘âleme ol sâz ile râz
- 614) Âsumân idi velî sâyir olur  
Çarhdan fark bu ol dâyir olur
- 615) Üştüre estere yogidi ‘aded  
Cümlesin bilmez idi hîç ahed
- 616) Yükleri yeşim ü zer ü la’l u kumaş  
Bister anun kimi kimi ferrâş
- 617) Rûmî mahbûblar u Rûmî gulâm  
Her biri lâle-ruh u serv-i hırâm
- 618) Oldılar ‘azm idip Îrân’a revân  
Ol sefer anları ‘iydiydi hemân
- 619) Kona göçe ol iki ilçi gider  
Yağlı ballu ikisi yeyüp içer
- 620) İlçiler geldi çü Îrâna karîb  
Virdi Behrâm işidüp mülkine zîb
- 621) Karşular memleket ucunda sipâh  
Cümle begler ile yok arada şâh
- 622) ‘Âlemün toldı içi bâng ü nevâ  
Oldı her kûşede ‘ıyş ile safâ
- 623) Sâz u söz oldu kamu reh-güzerî  
‘Ayş u nûş oldu hemânâ seferî
- 624) İrdi çün şöhret ile şehre nigâr  
Oldı râhına zer ü sîm-nisâr
- 625) Çokdı bânûları ağır ile hem  
Geldi yirine pes âyîn-i ‘Acem
- 626) Oldılar karşılayup la’l-feşân  
La’l üzere yürüdi serv-i revân
- 627) Tevseni pâyine hınna idi la’l  
Aşınur lülüye basmagıle na’l
- 628) Döşediler yoluna hazz ü harîr



Saçdılar her harafa müşk ü ‘anber

- 629) Düşdi sâzendeler önine revân  
Nagme-ger kimi kimi raks-künân
- 630) Çün sarâya gelür ol sûret-i Çîn  
Karşular ‘izzet idüp şâh-ı zemîn
- 631) Saçılar saçup ana hüsrev-i şark  
İtdi dür-dâne-i cevherlere gark
- 632) Tutdı cennetde çün ol Tûbî-mekân  
Oldı ol hûriyile bâg-ı cinân
- 633) Sûr-ı esbâbına pes başladı şâh  
Eyledi çeşn ü harab bir nice mâh
- 634) Bezl idüp ‘âleme sîm ile zeri  
Dökdi meclislere şehd ü şekeri
- 635) Toldı kâlâ-yı garîbiyle sarây  
Yer bulunmazdı iki kişi koya pây
- 636) Ger olup bâng-i rebâb ile felek  
Geldi bülbül gibi ol bezme melek
- 637) Bezmi zeyn itdi görür kût-ı revân  
Oldı hayvân suyu zulmetde nihân
- 638) Sâkinün kalmadı sâkında çü tâb  
Oldı âb ile tehî bâde habâb
- 639) Zîynet-i bezm olalı kebk-i derî  
Almaz oldılar ele gül-şekeri
- 640) Şerbet-i şehd olup arada sebîl  
Mevc urup akdı mey-i nâb çü Nîl
- 641) Bülbüle bülbüli çün itdi sadâ  
Toldı ‘âlem içi bâng ile nidâ
- 642) Akıdup agzı suyun meclise câm  
Eyledi serv gibi sâkîyi hırâm
- 643) Mest olur kor içine bülbüle baş  
Râz-ı sâgar açılup eyledi fâş
- 644) Başladı şîveye sâkî-i zarîf

Nagmeger okıdı eş'âr-ı latîf

- 645) Şevk ile şöyle içerler mey-i nâb  
Gark ider bunları kim seyl-i türab
- 646) İzn viridi gidene şâh-ı cihân  
Kaldı mahremleri şâh ile hemân
- 647) Gitdi anlar dahı şeh kaldı hemîn  
Kıldı ta'yin mihir mevrîd-i dîn
- 648) İtdiler 'akd u nikâhı çü dürüst  
Getürür yanına şeh dil-beri cüst
- 649) Gördi Kayser kızının çünki yüzîn  
Kendüzünden geçüp unıtdı sözün
- 650) Gördügi yogidi bu resme nigâr  
Serv-kadd gonçe-dehen lâle-'izâr
- 651) Meyl idüp bin dil ü cânıyla ana  
Subha dek sürdi anun ile safâ
- 652) Subh-dem eyledi dîvânını şâh  
Tahtına çıkdı geyüp başa külâh
- 653) Bir ziyâfet ider ilçîye ki şâh  
Görmedi mislini hûrşîd ile mâh
- 654) Şol kadar viridi ana sîm ile zer  
İtmez oldu ki zer u sîme nazar
- 655) Eyledi Kayser ile 'ahd u karâr  
Kim olalar bir birine hisâr
- 656) Ogul ata oluben ol iki şâh  
Oldı bir ol iki mülk iki sipâh
- 657) Gönderür ilçî ol 'âlî-nijâd  
Göricek Kayser olur hurrem ü şâd

REFTEN-İ CİHÂN -PEHLEVÂN MÂNEND-İ  
RESÛLÂN BE- MÛLK-İ HİNDUSTÂN

- 658) Dimiş efsûn-ger-i efsâne-nigâr  
Sihir ile dürler idüp kilik nisâr
- 659) Kasd ider husrev-i iklîm-i 'Acem

Varuben Hinde dike anda ‘alem

- 660) Seyr idüp memleket-i Hindî temâm  
Kendüye şehirlerini eyleye râm
- 661) Hep ‘ayâr eyleme serverlerini  
Sınayup gördü dilâverlerini
- 662) Bile nice ider ol kavm-i kıtâl  
Kendüye anda bulunur mı hemâl
- 663) Fethine çâre nedür fikr kıla  
Hîle vü erlik ile Hindî ala
- 664) Yedi mülkün olıcak derdine mîr  
Kasd ider Hinde dahı şâh-ı dilîr
- 665) Yerine Fûrsi yine eyledi şâh  
Geydirür başına Behrâmî külâh
- 666) İlçiler sûretine girdi hemân  
Armagan hâzır idüp şâh-ı cihân
- 667) Emr ider kâtib alur deste kalem  
İtmege nâme şeh-i Hinde rakam
- 668) Evvelâ nakş idüben nâm-ı Hudâ  
Yazdı ‘ünvânına hamd ile senâ
- 669) Vâcib oldur ne kadar var ise nâs  
İdiler hazretine şükr ü sipâs
- 670) Pâdişehler kamu yanında zelîl  
Birdürür kudretine peşşe vü pil
- 671) Kimse virdüğüne mâni’olamaz  
Sa’y ile virmedüğünü alamaz
- 672) Viren insâna kerâmât u cûd  
İtdiren ana sürûşına sücûd
- 673) Oldı her bir eseri şâhid-i zât  
Anun emriyle hayât ile memât
- 674) Yaradılmış kamu mahfi vü ‘ayân  
Her biri varlığını itdi beyân
- 675) Halk mahlûkdurur hâlık odur

Halk merzûkdurur râzık odur

- 676) Her ki bir bilmez olur ehl-i cahîm  
Hâmiye ehli alur içe hamîm
- 677) Birdürür birliğine itme gümân  
Şâhid-i vahdetidür kevn ü mekân
- 678) Dimiş ey Hindün şehi gözini aç  
Gönder elbette bana bâc u harâc
- 679) Gönderür idün olunmazdı haleb  
Gelmedüğine nedür şimdi sebep
- 680) Feyzüni bir bana gönder zer ü sîm  
Tîgdan başun ola tâ ki selîm
- 681) Düşmen idinme beni kendüne sen  
Olmaya pirehenün tâ ki kefen
- 682) Hışm ile Hinde çekem çünkü sipâh  
Nizeler ‘âlemi tuta çü siyâh
- 683) ‘Âlemi tolduruben tîg u teber  
Mülküni eyliyeler zîr ü zeber
- 684) Kalmaya kal’a ki olmaya harâb  
Kalmaya kimse ki çekmeye ‘azâb
- 685) ‘Avret ü oğlan ola cümle esîr  
Kalmaya kimsenede köhne hasîr
- 686) Mülk ü mâlunıla başın da gider  
Hele ben sana didüm toğrı haber
- 687) Yalunuz Hinde varup Rüstem-i Zâl  
Eylemişdür defe’ât ile kîtâl
- 688) Hind serverleri bulamadı nefer  
Kıldı ol memleketi zîr ü zeber
- 689) Çünkü andan degülem ben dahı kem  
Hindulardan gele mi gönlüme gam
- 690) Pehlevânım bana yok şimdi nazîr  
Terk-i tâc oldu bana zir-i serîr
- 691) Elüme çünkü alam tir ü kemân

Varmadan hasm vire vehm ile cân

- 692) Elüme çünkü alam tîg u mecen  
Gevşeni düşmenün ola kefen
- 693) Senden ulu şeh idi hüsrev-i Çîn  
Gitdi başı bana itmek ile kîn
- 694) ‘Alemün şâhiyidi Kayser-i Rûm  
Turamadı bana itdüm çü hücûm
- 695) Darb-ı dest ile olup tâc-ı giyân  
Olmuşum tîgum ile şâh-ı cihân
- 696) Cengde kimdir uzadan bana dest  
Kim onun eylemeyem kadrini pest
- 697) Çü cihâzum altımda cümân  
Turamaz hamlesine pîl-i demân
- 698) Benden öğrendi cihân halkı neberd  
Görse kim tîgum olur zer gibi zerd
- 699) Benim ile bilüben rezm ü kemâl  
Benden öğrendi cihân halkı cidâl
- 700) Cehl ile eyler isen ceng ü cidâl  
Getürem başuna çok dürlü zevâl
- 701) Sözümi tutup olursan bana yâr  
Çalışayum yoluna leyl ü nehâr
- 702) Cümle Hindî ideyüm emrüne râm  
Şehlerini ideyüm sana gulâm
- 703) Nâmeyi böyle diyüp itdi temâm  
Yazdı pes âhirine temme kelâm
- 704) Ne kadar varise gâyet de dilîr  
Bile yoldaş idünür şâh-ı serîr
- 705) Kodı her birini bir hidmete bes  
Ki görüp itmeye vehm anları kes
- 706) Her biri kendüyi pinhân kılur  
Kimi sâyis kimi har-bende olur
- 707) Bir kılâvuz oluben şâh-ı cihân

- Hinde bu hayli ile oldu revân
- 708) Hinde yakın varicek şâh-ı cihân  
Gönderür şeng ile bir peyk-i revân
- 709) Geldigin işidicek Hind şehi  
Gönderür karşılamaga sipehi
- 710) Aldılar gitdiler ikrâmlar idüp  
Vardılar Dehli'ye müddetle gidüp
- 711) Şöhret ile gelicek şehrine şâh  
Kondurur 'izzet ile anı sipâh
- 712) Pür olur et'amadan konduğu çây  
Matbaha döndi hemîn sahn-ı sarây
- 713) Eyledi yeyüp içüp çünkü huzûr  
Gidüben vehmi tolar kalb-i sürûr
- 714) Şâh-ı şengül geyüben başa külâh  
İtdi dîvân kıluban cem'-i sipâh
- 715) Encümen oldu gelüp çünkü sipâh  
İlçiyi da'vet ider yanına şâh
- 716) Geldi çün şâh sarâyına karîb  
Pîş-keşlerle virüp kendüye zîb
- 717) Çeküben pîş-keşin öpdî zemîn  
Çıkarup nâmesini sundı hemîn
- 718) Başına kodı öpüp nâmeyi şâh  
Okudur işüdüp incindi sipâh
- 719) Didiler kim kim ola şâh-ı 'Acem  
Ki bu vehm ile idüp nâme-rakam
- 720) İ'tibâr itmeye göndere size  
Bu berâberdür ölüm ile bize
- 721) Şeh dönüp ilçiyeye pes kıldı hitâb  
Eyledi hüsrev-i Îrâna 'itâb
- 722) Didi dîvâne midür şâh-ı 'Acem  
Diline geleni diye çü kalem
- 723) Şol sühan kim ider ruhsârı midâd

- Diye mi anı olan ‘âlî -nijâd
- 724) Ululuk olsa nijâdında eger  
Bize göndermez idi böyle haber
- 725) Bir kişi kim giye başına külâh  
Her şehün kadrini bilmeseydi günâh
- 726) Hind ne mülk idügün bilmedi şâh  
Yokdurur sandı ola bunda sipâh
- 727) Gelür ise göre hâlini n’ola  
Çinde bulmadığını bunda bula
- 728) Bilmemiş neydüğünü pîl meger  
Fark kılmaz ola ya nef’ ile zar
- 729) Sanur ola bizi ol hayl-i Tatar  
Yok sanur bizde dahı tîg u teber
- 730) Sanmasun bir ok atup bizi döner  
Cenkde biz iderüz sîne siper
- 731) Toludur Hindün içi pîl-i demân  
Her biri leşkerimün şîr-i jiyân
- 732) Bunların san’atıdır ceng ü cidâl  
Biri dönmez olur olursa kîtâl
- 733) Ne söz idi bu söz anun ki dir ol  
Bize korkutmak ile mi bula yol
- 734) Raylar başlarına giyeli tâc  
Virmediler dahı bir şâha harâc
- 735) Öldürürdüm yâ iderdüm seni lâl  
Resmdür ilçiyey yok lîk zevâl
- 736) Didi Behrâm ki ey şâh-ı cihân  
Nakldür vâcib olan bana hemân
- 737) Her ne kim didiyise hazret-i şâh  
Dimesem olur idi bana günâh
- 738) İder idi varıcak bana ‘itâb  
Ne ‘itâb eyler idi belki ‘azâb
- 739) Şâh-ı Hind itdi çü Behrâma nazar

Gördi kim lâıık u dîhîm ü kemer

- 740) Cüssede pîl ü şeca'atde çü şîr  
'Akıl ü hoş-sühan ü merd-i dilîr
- 741) Begenür gâyet anı şâh-ı cihân  
Kasd ider alı koya anda hemân
- 742) Virdi dîbâlar şemşîr ü kemer  
Cevherî tâc u zer ü sîm u güher
- 743) Gönderür yine mekânına şehi  
İledür menzile seyyâre mehi

BEZM-İ ŞÂH-İ HİNDÜSTÂN VÜ MUSÂRA'A-İ  
CİHÂN PEHLEVÂN

- 744) Derc iden derc-i ma'âniye dürer  
Şöyle nazm eyledi bu silke güher
- 745) Ki seherden turuban Hind şehi  
Lâleveş başına geydi külehi
- 746) Bâgda serv gibi kıldı karâr  
Çetr-i şâhı dutar üstinde çenâr
- 747) Bezm-i sâz aldı gülistânda çü gül  
Zeyn ider meclisini nukl ile mül
- 748) Virdi fer meclise gılmân ile hûr  
Saçdılar şem' gibi her biri nûr
- 749) Yer yer oturdı gelüp çeng-nevâz  
Her biri aldı ele nâz ile sâz
- 750) Toldı sâkîler ile bezm-i şerîf  
Her biri sâde ruh u şûh u zarîf
- 751) Geldi memzûc u sürâhî vü kadeh  
Kalb ola tâ zer ü sîm ile ferah
- 752) Meclis esbâbı kamu sîm ile zer  
Tâs-ı sâka gibi pür câmı güher
- 753) Geydi her sîm-beden gevherî tâc  
Hûbluk memleketinden k'ala bâc
- 754) Gerd-i dibâlara bağlandı kemer



- Hüsn-i kadrini mezîd eyledi zer
- 755) İlçiyi meclisine da'vet ider  
Kodılar anun çün kürs-i zer
- 756) Meclise geldi şükûhiyle çü şîr  
Döşediler rehine çînî harîr
- 757) Saçdılar her yanadan sîm u zeri  
Sîm ü zer ferşe döner reh-güzeri
- 758) Karşular şeh dahı bir niçe kadem  
Geldi oturdı ser-efrâz-ı 'Acem
- 759) Buldı şâh ile şeref kürsi-i zer  
Kürsi san hâtem idi şâh-ı güher
- 760) Gördiler hey'et ü sîmâda çü şîr  
Begenürler anı sultân u vezîr
- 761) Yâl ü bâlına iderler çü nazar  
Egdiler Hind dilâverleri ser
- 762) Kadd ü kalıbda görürler ki çü pîl  
Rân-ı bâzûsı hemîn rûyına mîl
- 763) Döyemez niçesine bebr-i beyân  
Turamaz cümlesine şîr-i jiyân
- 764) İtdi serverlere şeh dahı nazar  
Begenür bunları ol ejder-i ner
- 765) İçilir şerbet olur devr-i temâm  
Çekilür meclise ardınca ta'âm
- 766) Toldı hüsnîler ile sahn-ı sarây  
Kim bulunmazdı kaşık komaga çây
- 767) Mihr ü meh kurs olur bezm de nâm  
Ol tabak güller ile sofrâ cinân
- 768) Yiyüp içildi çü götrüldi ta'âm  
Seyl olup akdı ara yerde müdâm
- 769) Bahr-i yâkûta salup keşti-i zer  
Yıgılur nûde gibi nukl ü şeker
- 770) Gün gibi devr idüben sâki vü câm

- Hûblar serv gibi buldı hırâm
- 771) Ney idüp nâle kılur çeng ü figân  
Toldı avâze-i sâz ile cihân
- 772) İçilüp mey çü çıkar başa şarâb  
İtdi Behrâm'a şeh-i Hind hitâb
- 773) Didi ey server ü ser-dâr ü dilîr  
Cüssede pîl ü şeca'atde çü şîr
- 774) Cân u dilden seni sevdüm hele ben  
Kıla bunda bizi terk eyleme sen
- 775) Yokdur oglum ki idem yirüme şâh  
Hep senün mülk ü hazâyin ü sipâh
- 776) İki Îrân kadarı var bu diyâr  
Yedî bîn pâre yarar kal'ası var
- 777) 'Ayş u nûş ile idüp sayd u şikâr  
Tâ şeref bula senün ile diyâr
- 778) Bir kızum var vireyüm anı sana  
'Ömrün oldukça du'â eyle bana
- 779) Anda hatm oldu cemâl ile kemâl  
Yokdurur ana zamânında hemâl
- 780) İtdi Behrâm çü bu sözleri gûş  
Şâd olup bir tolu itdi şeh nûş
- 781) Baş urup emrüne oldum didi râm  
Kıldı sevgend ile 'ahdini temâm
- 782) Şâh-ı Hind oldu bu ma'niye ferah  
Toldurup sundı ana yine kadeh
- 783) Nûş idüp didi ki ey şâh-ı cihân  
Bir yana olsa eger halk u cihân
- 784) Dönmezem gam yemezem ceng iderüm  
'Âlemi başlarına teng iderüm
- 785) Bilmedi kadrımı Behrâm-ı dilîr  
Döyemez yoksa benüm pençe-i şîr
- 786) Göresin çün ola ey şâh-ı kîtâl

- Bulunur mı bana meydânda hemâl
- 787) Ya alıcak elüme gürz-i girân  
Döye mi heybetüme şîr-i jiyân
- 788) Hüsrevâ olmayıcak vakt-ı neberd  
Kadrini bildiremez lâf ile merd
- 789) Hele bir gün olalum seyre süvâr  
Göre merdâneligimi bu diyâr
- 790) Göreler niçe olur erde hüner  
Tutulur ya niçe şemşîr ü siper
- 791) Küşt-girem bana her kim ura dest  
Basup elbet iderüm kadrini pest
- 792) Bir zeber dest bul ey şâh-ı zemîn  
Kadd ü kâlibda ola pîl hemîn
- 793) Ki güreş dutam anun ile fakîr  
Ya beni ol ya idem ben anı zîr
- 794) Zûr u bâzumı göre halk-ı cihân  
Uzada medhine her kişi zebân
- 795) Var idi bir güreşür tâze cüvân  
Pîle benzerdi mehâbetde hemân
- 796) Pîlden artuk idi eylese zûr  
Her öginde yer idi bir nice gûr
- 797) Âhen olur idi destinde hamîr  
Görmemiş mislini bu ‘âlem-i pîr
- 798) ‘Azm-i rezm itse kaçana kim şehr-yâr  
Esb çekemez pîle olurdu süvâr
- 799) Tîre ebridi degül idi beşer  
Sâ’ika sanur idi savtını ger
- 800) Destinün her biri bir şâmî-mecen  
Regi a’zâsunun içünde resen
- 801) Agzı bir tûfte tenür idi hemân  
Her biri dişlerinün nûk-i sinân
- 802) Burnı har-gâh u sûtûn idi sûtûn

Zâl-i zerri ide küştide zebûn

- 803) Bu kadar gövde ile işci vü cüst  
Heft ile göre şeh olmaya süst
- 804) Da'vet eyledi anı mescide şâh  
Geldi baş urdı şeh öninde sipâh
- 805) Gördi Behrâm anı bir pîl-i sûtürg  
Döyemez nicesine bebr ile gürg
- 806) Bakamazlar bu yüzine şöyle mehîb  
Döndürür çarha-geri arzı çü sîb
- 807) Vehm kılmađı görüp anı dilîr  
Çekinür ana şikârına çü şîr
- 808) Bildi Behrâmı dahı pîl-i siyâh  
Yâl ü bâlına onat itdi nigâh
- 809) Gördi bir Rüstem-i dem-ejder ü ner  
Döyemez niçesine pîl ü hizebr
- 810) Nazar itdükçe olur vehm-i füzûn  
Olmadan dert dahı oldı zebûn
- 811) Emr ider şeh soyınur ol iki meyl  
Geldiler cüş ile meydâna çü seyl
- 812) Pehlevân yerine turmış idi şâh  
Dest-yâri gibi pâý öpdı sipâh
- 813) Dest urup çün yapışur o iki pîl  
Sarmaşuben tolaşur san iki mîl
- 814) Zûrı bâzûya getürdi iki şîr  
Oldı bir anlara bâlı ile zîr
- 815) Cüş idüp iki taraıdan iki seyl  
Karışur birbirine Kulzum ü Nîl
- 816) Tutuban bir kesesin şâh-ı cihân  
Sındurup yere ider anı hemân
- 817) Çaldı tagıtdı idüp def'-i zebûn  
Halk bildi kim idüğini füzûn
- 818) Çekdi bir ayagını yanına pes

Asılur mahmil ile mânend-i ceres

- 819) Kündesin anlamayup itdi hemân  
Kaldı hayrân kaluban pir ü cûvân
- 820) Def'i basdığını ol pîli bu şîr  
Hayrete vardı görüp şâh u vezîr
- 821) Sîm u zer itdiler üstine nisâr  
Sîm u zerden olur eârâf hisâr
- 822) Hil'at u tâc ile şemşîr ü kemer  
Virüp itdi şehi tâcına güher
- 823) Bu güreşdür dedi ey şâh-ı cihân  
Bir güreşmekle ne fark ola cûvân
- 824) Güreşelüm iki kez dahı şehâ  
Artık eksik kim ise kâhir ola
- 825) Yine el urdı silünüp iki dîv  
Sarılup birbirine kopdı girîv
- 826) Oldı bî-cân çün iki ejder-i ner  
Na'ralar urur idi mest-i hizebr
- 827) Kapdı başına çıkardı anı şâh  
Fark üstinde tutar hem çü külâh
- 828) Bahş idüp anda anı şâh-ı cihân  
Kodı arkasınun üstine hemân
- 829) Döküben her biri bulut gibi ter  
Toprak oldular olup zîr ü zeber
- 830) Yine silinüp urur çün şâh el  
İntifâ itdi siyeh hemîl-i bel
- 831) Süddelemler urur idi ana şâh  
Bulımaz idi velî kaçmaga râh
- 832) Keşmiyândan çevirüp eyledi zîr  
Loglamalar virüben itdi esîr
- 833) Tagıdur çünki câlib-i çenber ider  
Bükdi bâzûlarını hem çü kemer
- 834) İledüp ensesine destini cüst

Şeh kodı oldu idüphasını süst

- 835) Pes idüp öpdi pes önünde zemîn  
Didi kim yirde el arkası hemîn
- 836) Baş urup geydi libâsın yine şâh  
Sevdi cân ile anı cümle sipâh
- 837) Yüki yetince içüp şâh-ı ‘Acem  
‘İzn alup basdı rikâbına kadem
- 838) Binüben vardı visâkına revân  
Yatuben râhat olur serv-i revân

SÜVÂR ŞODEN-İ ŞÂH-I HİNDUSİTÂN U  
MERDÎ-NİM DEN-İ CİHÂN PEHLEVÂN

- 839) Tevsen-i çarha çü mihr oldu süvâr  
Bindi Behrâm ile şeh tutdı kenâr
- 840) Çıkdı seyrâna bile cümle sipâh  
Necm idi halk iki şeh mihr ile mâh
- 841) ‘Âleme toldı sadâ ile sahîl  
Gûş-ger ider idi na’ra-i pîl
- 842) Vardı meydâna vü saf çekdi sipâh  
Didi Behrâm’a besâ lutf ile şâh
- 843) Ke’y cihângîr ü cihân-dâr u dilîr  
Zûr u bâzûda vü heybetde çü şîr
- 844) Cilve kıl cilve-gehün oldu mesâf  
Hind serverleri tâ kılmaya lâf
- 845) Göreler niçe togar anadan er  
Tutulur ya nice şemşîr ü siper
- 846) Yâ nice olur imiş esb-i cemân  
Tutulurmuş ya niçe şast u kemân
- 847) Tutulur elde niçe tîr ü kemân  
Durulur saga sola nice nişân
- 848) Pes çerâyendesini itdi cemân  
Sandı görenler anı bâd-ı vezân
- 849) Şâh-ı şeh-bâz idi vü rahşi ‘ukâb

- Hind serveleri yanında gurâb
- 850) İbtidâ aldı ele tîr ü kemân  
Urdı sagına vü solına nişân
- 851) Urdı anın dahı sûfârına tîr  
Hayrete vardı görüp şâh u vezîr
- 852) Bir okını ol atup şâh-ı cihân  
Kıldı sûfârını birine nişân
- 853) Okına oldu yine okı siper  
Olmadı k'o hamel-i haste-ciger
- 854) Halkalar eyledi meydânda nişân  
Ki ala nîze ele şâh-ı cihân
- 855) Halkalardan çü zırh geydi zemîn  
Kıldı şeh nîze ile bir yere cîn
- 856) Âsiyâb gibi çevirdi anı tîz  
Urdı senge idüben sengine tiz
- 857) Döymedi nîzesi zahmına hacir  
Güzer itdi nitekim bizden eber
- 858) Gösterür bunlara çün lu'b-ı sinân  
Aldı def'i eline gürz-i girân
- 859) İtdi perrân anı vâpesi devân  
Kabzasından yetişüphutdı revân
- 860) Âsumâna çıkıcak ebr misâl  
Reşk ider çünki yire ine hayâl
- 861) Koyup anı eline aldı hüsâm  
Gösterir lu'blarun cümle temâm
- 862) Âsumâna atuben tîg-ı revân  
İnmeden aldı ele tîr ü kemân
- 863) Eyleyüp sür'atle rahş-ı demân  
Zeyn üstünde turur elde kemân
- 864) Uruban râst-ı nişânına hadeng  
Urdı pes kabza-i şemşîrine ceng
- 865) Yine vurdı sola vü saga nişân

Oturup zeyne nihân itdi kemân

- 866) Çaldı düşürdi atı na'lini hem  
Sümm-i esbine irişmedi elem
- 867) At segürdürken inüp yine biner  
Sür'atıle ki olur hayra nazar
- 868) Ne kadar var ise lu'bile hüner  
Gösterir şâha şehi şîr-ciger
- 869) Âferîn eyleyüben itdi nisâr  
Üstine her ne kadar genci ki var
- 870) Oldı ol mâh ile yagmacı ganî  
Hisse-dâr oldı şerîf ile denî
- 871) Şâd olup geldi her âyîne emîr  
Bile yanınca cihân-dâr-ı dilîr
- 872) Subha dek eylediler 'ayş ile nûş  
Demleri itdi yine mey gibi cûş
- 873) Mest olup itdiler ol gice huzûr  
Şevk-i dil-dâr ile pür kalbi sürûr

MÜJDE KERDEN-İ VEZÎR ŞÂH-I HİNDUSİTÂN  
BE-CİHÂN PEHLEVÂN

- 874) Şâh-ı şengül turuben subh meger  
Gönderür kendi vezîrine haber
- 875) Ki gelüp halvet ola şâha karîn  
Biri ol ola biri şâh hemîn
- 876) Gelüben şâha du'â itdi vezîr  
Yüz urup ayagina öpdi serîr
- 877) Didi ey hem-reh u hem-râz u enîs  
Yâr-ı hem-zâd u vefâ-dâr u celîs
- 878) İledüp tâc ile Behrâm'a kemer  
Eyledüm vâli-i mülk ilehaber
- 879) Kızuma virdüm iderüm ana sûr  
Ki melikdür yaraşur hem-dem-ı hûr
- 880) Bu sözi işidicek itdi pesend



- İrmesün devletüne didi gezend
- 881) Vardı Behrâm'a du'â itdi vezîr  
Didi ey lâyı-k-ı dîhîm ü serîr
- 882) Çok selâm eyleyüben sizlere şâh  
Virdi taht ile libâseyle külâh
- 883) Kasdı bu vâli-i mülk ide sizi  
Anıniçün size gönderdi bizi
- 884) Kızını virdi ki dâmâd olasın  
Şâh olup memlekete şâd olasın
- 885) Kız degüldür ya perîdür ya melek  
Görmedi ancılayın mihri felek
- 886) Hulk idelden berü dünyâyı Hudâ  
Gelmedi ana bedel mâh-likâ
- 887) Dâyim ol mâh nikâb ile gezer  
Yüzine bakmaga yok tâb-ı basar
- 888) Gerçi ser-geştesidür mihr ile mâh  
Bulmaz menziline perisi râh
- 889) Görse Havva tola kalbine hevâ  
Diye yok hûride bu hüsn ü behâ
- 890) Göricek sen anı ey şâh-ı cihân  
Kulu olduğuna yok hiç gümân
- 891) Hûblar gördün ola nice nice  
Lîk 'ömr oldur anun ile geçe
- 892) Vasfın işitmiş idi şâh-ı zemîn  
'Aşık oldu dil u cân ile hemîn
- 893) Her ki zen dost ola işide cemâl  
Sabra kalur mı dahı anda mecâl
- 894) Didi şeh çünki kabûl itdi bizi  
Başımın yüzimün üstine sözi
- 895) Lutf-ı zencîri bizi eyledi bend  
İrmesün devlet ü 'ömrine gezend
- 896) Bizi gurbetde idük kıldı ferah

İrmeye kalb-i şerîfine terah

- 897) Beni gurbetde garibsetmedi şâh  
‘Ömrün ü devletin artursun İlâh
- 898) Bana bu eyüligi çün eyledi şâh  
Şâhdan istemezem genc ü külâh
- 899) Hükmüne râm ideyüm Hind’i temâm  
Eyleyüp şehlerini ana gulâm
- 900) Şehligün isemezem şahlığ ana  
Lutf çok çok kerem eyledi bana
- 901) Lutfunı şeh ne kadar itse mezîd  
Farzdur arta ‘ibâdetde ‘abîd
- 902) Yüz urup pâdişeh eyle du’â  
‘Arz kıl lutf ile bizden ü rızâ
- 903) Kemerî tâcı virüp gitdi vezîr  
Varuben urdı yire yüz çü hasîr
- 904) Çün bisât eyledi pes bast-ı kelâm  
Neyise didi peyâmını temâm
- 905) Şâd olur işidüben şâh-ı cihân  
Çeşm-i esbâbına başladı hemân
- 906) Emr ider kim gele bir ehl-i salâh  
Vakt-i meymûnda ide ‘akd-ı nikâh
- 907) İtdi mûbed gelüben ‘akdi temâm  
İşidüp oldu ferah kebk-i hırâm
- 908) Şâd olur bu işe gâyet de sipâh  
Bildiler Hind’e olur şüst ü penâh

ZİFÂF-I ŞÂH-I HİNDUSÎTÂN VE DÂMÂDÎ-I  
CİHÂN PEHLEVÂN

- 909) Olıcak bir kişiye devlet yâr  
Hâsıl olur ne murâdâtı ki var
- 910) Buluban cümle hayâlat vukû’  
Râmdur her ne işe itse şurû’
- 911) Pehlevânun çün murâdiydi hasîb

- İtmeden sa'y Hudâ kıldı nasîb
- 912) Şâh-ı şengül çalışup saçıla şâm  
Çeşn-i esbâbını çün itdi temâm
- 913) Ne kadar varise mülkünde sipâh  
Sûrına gelmege emr eyledi şâh
- 914) Şehrden taşra çıkup şâh-ı vezîr  
Dikülüp hayme vü kuruldı serîr
- 915) Çetrdn hiç görünmezdi felek  
Sâyebân olmuş idi bâl-ı melek
- 916) Çâr-mîh eyledi sahrâyı veted  
Perdeler itdi sabâ râhını sed
- 917) Başladı gelmege mâl ile menâl  
Şol kadar kim idemez vehm-i hayâl
- 918) Toluben dest içi avâz-ı nefîr  
Dutdı sahrâyı nihâlî-i harîr
- 919) Çıkuben tahtına oturdı çü şâh  
Geldi şâdiliga ol sûra sipâh
- 920) Şeh yanında kodılar kürsî-i zer  
Ki gelüp otura ol 'âli-güher
- 921) Gelicek burcına Behrâm çün mâh  
Aldı encüm gibi ortaya sipâh
- 922) Çün şeref buldı mekîn ile mekân  
Oldı ferhunde zemîniyle zamân
- 923) Toldı pes meclis içi sâz ile söz  
Yakılup 'ûd olur bezm-i fûrûz
- 924) Başladı eylemege nây-ı enîn  
Kalmadı bezmde bir kalb-i hazîn
- 925) Dir cihân varlığıdur çün bu nefes  
Komanuz dilde hevâ ile heves
- 926) Ceng ü kânûn idicek nâle vü âh  
Def kadar karşı geçüp sîni-i kâh
- 927) Hûblar raks uruban oldu cümân

- Tîr olur kadleri ki kâh temâm
- 928) Kâh tâvûs gibi cilve-nümâ  
Kâh gerdân idi mânend-i semâ
- 929) Çekdiler meclise enva’-ı ni’am  
Yemededen içmeden incindi şikem
- 930) Kaldurup aşları çün geldi şeker  
Meclise nukl virür zîb ile fer
- 931) Şekerî peyker ile toldı zemîn  
Oldı san bezmün içi hâne-i çîn
- 932) Başladı devri yine sâki vü câm  
Hûblar her tarafa kıldı hırâm
- 933) Oldı memzûc çü memzûc ile pür  
Lûlesi bezme döker la’l ile dūr
- 934) Mest olup bülbüliden gitdi karâr  
Şevk ile itdi terennüme çü hezâr
- 935) Başladı açuluban söylemege  
Sâgarî bûs u kenâr eylemege
- 936) Yinüp içülür olur bezm temâm  
Gıtdiler meskenine hâss ile ‘âm
- 937) Şâm irüp çünki olur vakt-i visâl  
Kalmadı sabra dil-i şeh de mecâl
- 938) Şâhı destûr iledüp ‘izzet ile  
Havlet-i hasa girür ragbet ile
- 939) Gördi şeh menzilini ‘adn-i berîn  
Virmiş ol burca şeref mâh-cebîn
- 940) Karşuladı şehi ol serv-i revân  
Saçdı sîm u zeri çün berg-i hazân
- 941) Virdi destûr el ele gitdi hemîn  
Kaldı Behrâm ile ol sîm u serîn
- 942) Dest-bûs eyleyüp ol gonce-dehen  
İtdi gül desteye san sûde hemen
- 943) Şeh dahı öpdî nigârûn lebini

- Okşadı germ oluban gabgabını
- 944) Kıldı çün ref'-i şehenşâh-ı nikâb  
Gün yüzünden sanasın gitdi sehâb
- 945) Bir melek gördi ki yok yirde nazîr  
Görmedi benzer ana 'âlem-i pîr
- 946) Cebhesi mâh idi vü kâşî hilâl  
Zeyn kılmış mehini nokta-i hâl
- 947) Çeşm-i cemmâşî ider gâret-i cân  
Dil ider gamze-i gammâz-nişân
- 948) Dil külingine atup zülf-i kemend  
Gör ne şâh-bâzdur itmiş anı bend
- 949) Ne hümâ sâyedür ol zülf-i siyâh  
Eyledi dil-beri dil-berlere şâh
- 950) Kâküli tûg idi kaddi sinân  
Hûblar içre 'alem gibi 'ayân
- 951) Çeşm-i sûzen gibi teng idi dehân  
Çün ebr kirpigi ser-tîz ü revân
- 952) 'Arızî şem'-i şebistân-ı cemâl  
Benzemiş sûhte pervâneye hâl
- 953) Deheni goncesinün içini dür  
Eylemiş şebnemi sâfî ile pür
- 954) Çâh-ı Bâbil idi çâh-ı zekânı  
Dest-res olmasa zülf-i reseni
- 955) Göricek oldı şehenşâh-ı dilîr  
Zülfî zencîrine çü şîr-i esîr
- 956) Elini öpdî vü sürdi yüzine  
Basuben bagrına aldı dizine
- 957) Yapışup zülfine öpdî lebini  
Okşadı germ oluban gabgabını
- 958) Görmemiş idi anun gibi nigâr  
Göricek kalmadı kalbinde karâr
- 959) Hall idüp lutf ile 'akd-i kemeri

- Düğmesin çözüp açar sim-beri
- 960) Gümüş âyîne idi sîne hemân  
Anda 'aksini görür şâh-ı cihân
- 961) Boyı serv ol iki pistân iki sîb  
Serv virdüğü semer lîk 'acîb
- 962) Câme-hâbına iletirdi anı şâh  
Deste-i gül idi sarıldı giyâh
- 963) Gerçi 'üryâna degül resm-i kemer  
Sâk-ı sîmini veli dil-ber eder
- 964) Şöyle germ eyledi cünnâlu büjûl  
Kâdir olsaydı eylerdi hülûl
- 965) Nefesi gitdi vü nâf oldu 'ayân  
Âşikâr oldu şehe genc-i nihân
- 966) Bedeni ak idi gâyetde çü 'âc  
Nâf-ı sâfiydi çün câm-ı zücâc
- 967) Ter ü tâze vü latîf idi zibâr  
Tolu gül-berk ile yüz yasdugu var
- 968) Virmemiş kîl dahı mirâte keder  
Görinür yüz olına çünki nazar
- 969) Sîb idi olmuşidi lik dü nîm  
Bula sıhhat anı görmekle sakîm
- 970) Şâh idi nigâr oldu kemân  
Eyledi cânını tîrine nişân
- 971) Zahm-vâr oldu çü tîr ile kemân  
Hokkadan la'l-i müzâb oldu revân
- 972) Dökilüp la'l tolar lûlû-yı ter  
Olur amîhte san şîre şeker
- 973) İkisi dahı bulur çünki murâd  
Diller asûde olur cânları şâd
- 974) Subha dek izleri 'ayş oldu müdâm  
Birisi râgıbidî birisi râm

PÎL-İ MEST-RÂ Kİ DER NEZD-İ KÛH-I KÂF  
PEST Ü BÎ-KADR BÛD

- 975) Urdı dem çünki seher bâd-ı sabâ  
Nâfe-rîz oldu demiyle hevâ
- 976) Pes şeker-hâbdan uyandı dilîr  
Felek olmuş meh ile gördi serîr
- 977) Bagrına basdı yine itdi kemân  
Kıldı cân ol dahı tîrine nişân
- 978) Devlet anun ki açâ çün gözini  
Göre çok sevdüğü yârî yüzini
- 979) Kendüzi uyuya bî-dâr ola baht  
Gele asan ana her iş k'ola saht
- 980) Hûbdur yâr ile 'işret seherî  
Dilde andan ola sevdâ eseri
- 981) Leb-be-leb sîne-be sîne olasin  
Vuslata irişesin kâm alasin
- 982) Biri birinden alup zevk ile kâm  
İkisi dahı bilür çünki müdâm
- 983) Nâz ile kalkup iki serv-i sehi  
Lâleveş başa giyerler külehi
- 984) Saçdılar güllerine tâze gül-âb  
Ki tutar tâze gülî çün ola âb
- 985) Düzinüp kuşanup ol sûret-i çîn  
Kendüyi hûriye döndürdi hemîn
- 986) Geldi ortaya yine sâz ile söz  
Yandı 'ûd oldu yine bezm-fürûz
- 987) Yine ni'met çekilüp geldi şarâb  
Dükeli bezmde nukl ile kebâb
- 988) Çün kadeh aldı ele şâh-ı cihân  
Ayag üstine turup serv-i revân
- 989) Kavşurup el turuban 'izzet ider  
İçecek sundı lebi nukli şeker

- 990) Şevk ile çekdi mehi yanına şâh  
Ki öpüp sînesin okşar idi kâh
- 991) Dest-bâzî idicek zülfi ile  
Nâfe-i çîni virür zülfi yele
- 992) Böyle ‘ayş eyler iken mâh ile şâh  
Girdi serv katına bir pîl-i siyâh
- 993) Kûh-ı Kâf idi sanasın nice pîl  
Kim görürise sana her yanı mîl
- 994) Her dişi remh-i kazâyıdı hemîn  
Ditrer altında yüriye çü zemîn
- 995) Benzemiş ejdere hortumı hemân  
Diyessin yüriyecek kûh-ı revân
- 996) Gûşınun her biri bir çarh-i siper  
Siper-i çarh ola mânendi meger
- 997) Agzı bir gâr idi tîre vü teng  
Kûlhan idi vü döşenmiş içi seng
- 998) Gözi âteş idi kuh üzre cümân  
Geh ‘ayân olur idi gâh nihân
- 999) Bend ü zencîrini kırmış idi mest  
Virür idi der u dîvâre şikest
- 1000) Mest idi eylemeden nûş-ı şarâb  
Nereye ugrasa eylerdi harâb
- 1001) Pîl-bân tutmaga eylerdi hazer  
Döye mi ejdere varmaga ciger
- 1002) Şâh karşı yürüdi na’ra- zebân  
Hâzır eyledi ele gürz-i girân
- 1003) Başına anun urup gürz-i girân  
Yıkılup virdi pes ol darb ile cân
- 1004) Pîl hortumunu sultân-ı zemîn  
Nâv-dân eyledi magzına hemîn
- 1005) Yapışup hortumına eyledi zûr  
Sürüdi taşra anı şîr çü gûr



- 1006) Çıkarup evden anı serv-i sehî  
Bıragur sokaga çün müşk-i tehî
- 1007) Geldi oturdı yine bezmine şâh  
Elini öpdî sürüp yüzine mâh
- 1008) Ol sürûr ile çeküp bâde-i nâb  
Beng-i neşat ile yine açdı şarâb
- 1009) Çünkü bu nev'i hüner eyledi şâh  
Âferîn itdi ana mihr ile mâh
- 1010) Gören işiden ider şâha du'â  
Güşte yol üzre yatur ejderhâ
- 1011) Oldı hengâmeler üstünde hemân  
Üşdi ol püşteye pîr ile cüvân
- 1012) İşidüp şâh ta'accübler ider  
Gönderir hüsreve çok sîm ile zer
- 1013) İduben seyr anı bir hefte temâm  
Geldi görmege anı mîr u gulâm

‘AZM-I VATAN-I HVÎŞ KERDEN-I PEHLEVÂN VE  
KÜŞTEN-İ GERGEDÂN

- 1014) İden efsâne-i dîrîneyi yâd  
Kıldı serpûş tabakdan çü küşâd
- 1015) Didi bir yıl turuban şâh-ı ‘Acem  
‘Ayş idüp sürdi nigârî ile dem
- 1016) Yine yâdına gelüp taht-ı Kiyân  
Kasd ider kim ola Îrân’a revân
- 1017) Râzını eyledi dil-dâre ‘ayân  
Şâh-ı Hind’e ider ol dahı beyân
- 1018) Bildi Behrâm idüğini anı şâh  
Şâd olur işiduben cümle sipâh
- 1019) Ne kadar var ise gencînede zer  
Kıymeti tâc-ı girân-mâye güher
- 1020) İledüp kıldı ayagina nisâr  
Şol kadar kim yogidi hadd ü şümâr

- 1021) Şükr idüp didi ki ey Nûr-ı Kiyân  
Buldı zâtunla şeref uşta bu mekân
- 1022) Uşta mülk uşta hazâyin u sipâh  
Âlet-i harb u matâya vü külâh
- 1023) Nem var ortada benüm cümle sana  
Bakdugum yüzüne yetmez mi bana
- 1024) Tek koyup gitme beni kılma hazîn  
Sensüz olamazam ey şâh-ı zemîn
- 1025) Didi Behrâm ki ey şâh-ı zaman  
Zâta lâzım gibi dıraht-ı vatan
- 1026) Severüm cân ile ben dahı şehi  
Bendesidür kamu Îrân sipehi
- 1027) İtdi bir bu iki iklîmi Hudâ  
İdeyüm şâha mekânımda du'â
- 1028) Zahmet itdük size ey şah-ı cihân  
Olalum mülkümüze biz de revân
- 1029) Şol kadar eyledük ey şâh-ı kerem  
Gelmez oldu ki hayâlüme 'Acem
- 1030) Lîk korkum budur a'dâ işide  
Gelüp Îrânı yaka bir iş ide
- 1031) Ayag altında kala mâl u menâl  
Cümle halkun gele başına zevâl
- 1032) Esem olam bana Hak ide 'itab  
Hazret-i Hakk'a bulunmaya cevâb
- 1033) Kılma tur yâd u gam ey şâh 'aceb  
Olamazam bu kadar kana sebeb
- 1034) Yâd ayak basa gire mülke çün el  
Râhat olup ne huzûr eyliye el
- 1035) Serzeniş eylemeden halk-ı cihân  
Varayum mülküme ey şâh-ı zamân
- 1036) Bizi unutma du'â eyle müdâm  
İdeyim ben de senâ subh ile şâm

- 1037) Sıla eylemege bu serv-i şehi  
Göndereyüm tapuna gâh gehi
- 1038) Nâgehân düşmen olur ise ‘ayân  
Bana tenbîh kıl ey şâh-ı cihân
- 1039) Göresin kim neler eyleyem ana  
Dahı kasd itmeye bir hasm sana
- 1040) Sûr-ı emr itdi bu şâdilğa şâh  
‘Ayş u nûş itmege başladı sipâh
- 1041) Hind mülkün idüben zeyn temâm  
Her kişi aldı ele câm-ı müdâm
- 1042) ‘Âleme toldı yine bâng-i rebâb  
Su-be-su seyl oluban akdı şarâb
- 1043) Şöyle zeyn eylediler şehrün için  
Oldı her kûşesi bir hâne-i çîn
- 1044) Şol kadar saçdı zeri şâh-ı zemîn  
‘Ar ider oldı gedâ itmege çîn
- 1045) Yidi gün eylediler ‘ayş-ı müdâm  
Yatup uyumak olur halka harâm
- 1046) ‘Ayşdan fârig olup şâh-ı cihân  
Didi destûre ki sen dahı hemân
- 1047) Hâzır ol şâh ile hem-râh olasın  
Her ne hıdmet buyurursa kılasın
- 1048) Hind serverlerini eyle güzîn  
Yalnız gitmeye tâ şâh-ı zemîn
- 1049) Yolda ne var idüğün kim ne bile  
Hele yekdür ise oldığı bile
- 1050) Ne kadar gerek ise mâl u menâl  
Yürü var defter idüp gencden al
- 1051) Hep tehî olunur çün berk-i râh  
Binüben mülkine ‘azm eyledi şâh
- 1052) Gönderecekdi şehi Hind şehî  
Bile yatınca cemi’-i sipehi

- 1053) Şâha şengül ider enva'ile pend  
Eremiye dolaşa tâ ki gezend
- 1054) Bile yatınca gider hayli zamân  
Dönderür yine şehi şâh-ı cihân
- 1055) Kıldı çok pend nigâre dahı şâh  
Elin ayagın öpüp eyledi âh
- 1056) Virüben dil-bere çün sîm ile zer  
Hatırın kıldı teselli vü dünür
- 1057) Düşüben deşte gider şâh ile mâh  
Gözedür anları esrince sipâh
- 1058) İdüp at üzere gehi bûs u kenâr  
Dest-bâzılar iderler iki yâr
- 1059) Her ne yerde ki göre çây-ı laâîf  
'İşret eylerdi inüp şâh-ı karîf
- 1060) İşi 'ayş olmuş idi subh ile şâm  
Yâr yanında vü destinde müdâm
- 1061) Sâz u söz idi yiyüp içmek idi  
'Ayş u nûş idi konup göçmek idi
- 1062) Yâr pehlûda vü baş ola çü sag  
Tag üstinde olur kişiye bâg
- 1063) Yâr her kime ki ola münis-i râh  
Serv olur ayagı el ise giyâh
- 1064) İrdi bir kûha ki mânend-i felek  
Yol bulamaz ana illâ ki melek
- 1065) Mesken-i dîv idi vü mâr min-i cân  
Geçmege korkar idi bâd-ı vezân
- 1066) Gergedânlar tolu her biri çü kûh  
Belki yok pîlde ol denlü şükûh
- 1067) Geldi ol kûha ki eyleye güzer  
Pişvâ didi ki ey ejder-i ner
- 1068) Maksada togru durur gerçi bu râh  
Hatarı çok gidemez lîk sipâh

- 1069) Bunda bir gergedân idindi vatan  
Vehm ider adın anup Çîn ü Hutên
- 1070) Şâh olmuş sanasın çarha sûtûn  
Zerrece gelmez ana pîl u heyûn
- 1071) Haml-i hâmil-i ‘anber aya nazîr  
Seng-lâhi sūmi eyliye fatîr
- 1072) Kûh yanında anun hem-çü habâb  
Pîl başında çü kûh üzre zübâb
- 1073) Şâh üzre dizilür bir niçe pîl  
Andan olur olıcak nev’i ‘alîl
- 1074) Şâh san pîl idi sîh-i kebâb  
‘Akıbet hâlin ider pîl harâb
- 1075) Şeh didi gergedan olursa hezâr  
Dönmezem vehm idüben yirde ne vâr
- 1076) Elüme çünki alam tîr ü kemân  
Gâvi-deşti gelür ol bana hemân
- 1077) Yüri Allah ile ol togrı yola  
Ne kaderlendiyyise olan ola
- 1078) Oldılar böyle diyüp yola revân  
Aldı Behrâm eline câcı kemân
- 1079) Kavs-ber-kavs-ı kuzah idi hemîn  
Siper olmaz okına çarh-i berîn
- 1080) Her okı harbiyidi senge geçer  
Bir idi sîne ile ana siper
- 1081) Giderek üstine ugradı sipâh  
İdinürler şehi vehm ile penâh
- 1082) Gördiler anı mehâbetde mehîb  
Tûli vü ‘arzı nihâyetde ‘acîb
- 1083) Gösterür hasmını çün râh-nümây  
Karşular anı elinde ok u yây
- 1084) Pek tutup kabzını toldurdı gümân  
Koltuğı altın ider râst-ı nişân

- 1085) Müşte peykân irüşür gûşına ger  
Gözedür tu'ma idinmege ciger
- 1086) Râst kondı cigerin eyledi çâk  
Oldı bir zahm ile üftâde helâk
- 1087) Baş üstine yıkıldı çü heyûn  
Sançılup şâyire oldı sûtûn
- 1088) Öldürüp anda anı göçdi hemân  
Şâhını kesdürüben aldı nişân
- 1089) Sa'y idüp ol yolu şâh eyledi mâk  
Buldıgı dâm u dedi kıldı helâk
- 1090) Gâh destinde gümân gâh kemend  
Kimin öldürdi kimin eyledi bend
- 1091) Geçüben kûhı irür deste çü şâh  
Secde-i şükr kılur cümle sipâh
- 1092) Dutup Îrân yolını oldu revân  
İrdi ser-haddine sultân-ı cihân
- 1093) Mülk-i ser-haddine irişdi çü şâh  
Şâd olup karşıladı şâh u sipâh
- 1094) Pây-tahta varup i'zaz ile şâh  
Tahtına çıkdı geyüp başa külâh
- 1095) Şeh kudûmıyla olur halk ferah  
Kimsenün kalmadı kalbinde tarah
- 1096) Yine Îrân'a tolar 'ayş u neşât  
Döşenür yine mecâlisde simât
- 1097) Zeyn ider bezmleri nukl ile câm  
Bir olur bâde-keşe subh ile şâm
- 1098) Cism-i bî-cân idi 'iklîm hemân  
Geldi şâh gelmesi ile yine cân
- 1099) Mürde cism idi cihân buldı hayât  
Şükre uzatdı lisânını nebât

EFRÂHTEN-İ BEHRÂM-İ GÛR SER-KIBÂB-I  
GÛN-Â-GÛN BE 'AYYUK

- 1100) Dâyimâ nakş iden envâ'-ı hayâl  
Şöyle nakş eyledi yazdukda misâl
- 1101) Geldi Îrâna çü ol Pûr-ı Kiyân  
Buldı anun ile şeref mülk-i mihân
- 1102) Toldı Îrânun içi bâng-i rebâb  
Akdı her ravzada su gibi şarâb
- 1103) 'Ayş u nûş ile geçüp yaz u kış  
Gülmek oynamak olur halkun işi
- 1104) Gün gibi tahta çıkup şâh-ı cihân  
Başladı dâd ile üstâde hemân
- 1105) Bir niçe gün idüben 'adl ile dâd  
Mülkü abâd ider vü dilleri şâd
- 1106) Güz geçüp irmişidi savlet-i dey  
Başladı tonmaga memzûcda mey
- 1107) Kalmayup meş'ale-i mihride nûr  
Mâh-ı kandîline irişdi fütûr
- 1108) Bâg u râgun koyuban seyrini zâg  
Gencveş günci kutup itdi ferâg
- 1109) Geydi sincâbını fertût-ı felek  
Reşk ider tâbedeki mürge melek
- 1110) Oldı her âb-ı revân üsti memerr  
Ferş-ı mermer düşedi devr meger
- 1111) Nâmıye oldı zemîn içre nihân  
Tâki dey şiddeti itmeye ziyân
- 1112) Hâk-i rahmında dahı bezr-i nebât  
Gelmemiş nutfе gibi ana hayât
- 1113) Kûh-ı küncinde peleng itdi hemîn  
Rûbehün olmaga kürkini hemîn
- 1114) Konacak yir bulamaz oldı huyûr  
Mîşede de idemez oldı huzûr
- 1115) Menzilin mârun idüp seyl-i harâb  
Mûş küncinde olur garka-i âb

- 1116) Tâb-ı sermâ ki komaz nârda tâb  
Âbı seng eyler ü sengi ider âb
- 1117) Toldı berf u yah ile kevn ü mekân  
Döndi yahdâne bürûdetle cihân
- 1118) Vakt-ı ‘ayş idi degül sayd-ı gehi  
Zevk ider şâh tagıtdı sipehi
- 1119) Aldı çünkim yedi iklîmi temâm  
İşi ‘ayş oldu şehün subh ile şâm
- 1120) Ceng ü âşûbden oldu çü halâs  
Meh-likâlarla ider sohbet-i hâs
- 1121) Ol kış ilçi saluben itdi taleb  
Kim kızını vire sultân-ı ‘Arab
- 1122) Virdi nîk-’izzet ile mihre mehi  
Şâh dâmâd idüben Mısr şehi
- 1123) Çıkarur hüsn ile bir meh dahı âd  
Lâle ruhsâr u Minû-çihir-nijâd
- 1124) İrs ile dikmiş idi ana mir’ât  
Nîk-nâm idi vü ma’mûr-ı cihât
- 1125) İşidüp anı nikâh eyledi şâh  
‘Ayşda hem-dem olur şâh ile mâh
- 1126) Mülkine kasd idüp ide diyü cenk  
Vehm idüp hem kızını virdi Firenk
- 1127) Kaçup anı dahı zevk eyledi şâh  
Her gice hem-demi bir hal’at-ı mâh
- 1128) Dürlü dürlü olıcak at’amalar  
Ta’m her birinün olur çü şeker
- 1129) Dâymâ gül-şeker olursa gıdâ  
Şübhe yokdur bulamaz zevk ü safâ
- 1130) Ni’met-i envâ’ile hoşdur çün ola  
Ki virür her biri bir dürlü safâ
- 1131) Hasr-ı ‘âciz işidür çünki hemân  
Mutlak olan başına şâh-ı cihân



- 1132) İstedügiyle çü ‘ayş ide kişi  
‘İydi nev-rûz ola yaz ola kışı
- 1133) Dâyimâ binilen olursa Burak  
Esb-i reh-vârda isteye mezâk
- 1134) Elde bir câm tura çünki müdâm  
Olur içene içindeki harâm
- 1135) Kasd ider kim yiye bir hûb-makâm  
İde tâvûslar içinde hırâm
- 1136) Her biri cilve idüp ola cümân  
Ola her gûşesi gül-zâr-ı cinân
- 1137) Kasr-ı cennet gibi zeyn ola kusûr  
Ravzası pür ola gilmân ile hûr
- 1138) Âb-ı kevser ola gül-zâr-ı behişt  
Taş der-hâk ola müşk-i sirişt
- 1139) Her dırahtı vire bir dürlü semer  
Her semer ola ‘uzûbetde şeker
- 1140) Belki her birisi bir Sidre misâl  
Müntehâ ola vire bâga cemâl
- 1141) Çekile sûr ana gâyetde bülend  
Düzd iriştirmiye vehm ile kemend
- 1142) Bâmına irmiye şâh-bâz-ı hayâl  
Kullesi hem-seri olmaya hayâl
- 1143) Kapusı tûc ola vü halkası zer  
Çevrüle üstine şeddâdî kemer
- 1144) Buldılar pes şehe bir ehl-i kemâl  
Hendesi bilmede yok ana hemâl
- 1145) Hûb- mi’mâr idi ressâm idi hem  
Hûş-mühendis idi kassâm idi hem
- 1146) San terâzû idi dikkatde gözi  
Hikmet-âmûz idi mecmû’sözi
- 1147) Nakş-perdâz idi pür-kâr hemân  
İki barmagıyidi itse nişân

- 1148) Ne kadar var ise envâ'-ı nukûş  
Yazuben eyler idi resm u hûş
- 1149) Sinnimâr ile olup niçe zamân  
Hıdmet itmiş idi üstâde cihân
- 1150) Kasd iderse yapa Şeddâdî- makâm  
Şöyle kim sana gören Dârü's-selâm
- 1151) Çünkü tasvîr yaz emânî-i çîn  
Göricek zinde sana anı hemîn
- 1152) Kasd kılsa yapa gerdûne nazîr  
Seng ile âhen elinde çü hamîr
- 1153) Çün mukarnas eve kırtas ola seng  
La'l sana gören ile vire reng
- 1154) Hem dıraht işini işlerdi garîb  
Kim du'â eyler idi görse habîb
- 1155) Tîşe vü başda üstâd idi ol  
Zûr u bâzûda çü idi ol
- 1156) Didi maksûdın ana şâh-ı 'Acem  
Emr kıldı ala destine kalem
- 1157) Bildi maksûdını resm itdi hemîn  
Tâ ki resmini göre şâh-ı zemîn
- 1558) Begenür resmi görüp şâh-ı cihân  
Ol yapar bildi murâdınca cinân
- 1159) İhtiyâr eyledi bir hûb-makâm  
Ki görüp reşk kıla Dârü's-selâm
- 1160) Sel-sebîl idi suyu hâkî 'abîr  
Agacı Sidre vü hazrâsı harîr
- 1161) Mürde içse suyunı vire hayât  
Bula ölmelü olan hasta necât
- 1162) Suyını ko ki hevâ-sı-y-la hemân  
Pîr-i fertût ola bir tâze cüvân
- 1163) Bir yirün çünkü olup yiri şerîf  
Ola âbı vü hevâsı da latîf

- 1164) Nedür ol cennet olur tâk u sarây  
Sâye har-gâh ola çün hûb ola cây
- 1165) Yeri rif'atde sipihr ile sivâ  
Her taraftan tokınur tâze hevâ
- 1166) Nazar itdükçe gider medd-i basar  
Heftelik yol görünür olsa nazar
- 1167) Cümle târâf açık hâyili yok  
Göz açıklığı temaşa-gehi çok
- 1168) Buldı bir ferruh-ı ferhunde-zamân  
Urdı bünyâdını sultân-ı cihân
- 1169) İtdi kurbânlar ol Şeddâdî direm  
Toldı ihsân ile mülk-i 'Acem
- 1170) Bir binâ yapdurur ol şâh-ı zemîn  
Kendüsi sandı görüp çarh-ı berîn
- 1171) Yapılup çıkdı çün ol sûr-ı bülend  
Asdılar üstine nîk-pâre perend
- 1172) Oldı çün burcu vü bârûsı temâm  
Geldi yüz sürüdi gayretle 'amâm
- 1173) Yapılur kaleleri hâre ile  
Zeyn her kullesi seyyâre ile
- 1174) Kullesi oldı hevâle felege  
Bâmı mesken idi dâyim melege
- 1175) Şöyle kalun yapılur seng ile sûr  
Çalınursa işidimez idi sûr
- 1176) Yapdı her dil-bere bir kasr-ı latîf  
Ki vücûd-ı-y-la anun ola şerîf
- 1177) Yapılup çün yapısı oldı temâm  
Soyıyup her birisine kodı hâm
- 1178) Nice câm idi safâda çü güher  
Virmemiş hâdisenün seng-i keder
- 1179) Oldı her câm güneş gibi münîr  
Olmaz idi gicede mâh nakîr

- 1180) Sırçası âyîne-i gîfî-nümâ  
Ziynet-i kalbe virür zevk u safâ
- 1181) Abanos idi derî mantar-ı ‘âc  
Sakfi altun idi vü sath-ı rihâc
- 1182) Suffesi her birinün ‘adne karîb  
Buldı her kûşesi bir resm ile zîb
- 1183) Sandal u ‘ûdi idi hep tahtaları  
Zeyn kılmış idi mismâr-ı zeri
- 1184) Zereler kimisi sîm ü kimi zer  
Hayre olur idicek çeşm-i nazar
- 1185) Kabları yaptı çü eflâk-i ‘azîm  
Hiştun biri zer ü birisi sîm
- 1186) Havz ider suffelerün önine hem  
Ki müretteb ola destûr-ı ‘Acem
- 1187) Sîm idi havzı şâdırvân-ı zeheb  
‘Ayşa vü nûşa virür şevk-ı şegab
- 1188) Her kemer kavs-ı kuzah idi hemân  
Nâzirün kaddini eylerdi kemân
- 1189) Tâklar bâmını kurşunladı hem  
Yagicek tâ ki nüfûz itmeye nem
- 1190) Kâr-ger-i kâr-gîr işini temâm  
Eyleyüp eyledi arâste-i bâm
- 1191) Kıldı nakkâşlar içini nigâr  
Hâne-i Çîn’e döner sakf-u cidâr
- 1192) Çünkü nakkaş idi işi tezhîbi beter  
İtdi tasvîr-i nüvîsende haber
- 1193) Ne kadar var ise eşkâl-i ‘acîb  
Resmini eyledi üstâd-ı lebîb
- 1194) Her birine virüben reng ü tırâz  
Oldı envâ’ına elvân birâz
- 1195) İtdügi işleri ol şîr-ı jiyân  
İtdi tasvîrini üstâd-ı cihân

- 1196) Buldı her cânibe yol âb-ı Fırât  
Havza vü çeşmelere geldi hayât
- 1197) İtdi fiskıyyeleri kasr-ı cinân  
San gül-âb idi akan âb-ı revân
- 1198) Hâs mermerle döşenmişdi memâr  
Kenti herbirinün sîm ile zer
- 1199) Çü temâm oldı gidüp şâh-ı cihân  
Göricek şekk idüben sandı cinân
- 1200) İtdi dil-berlerini şâh-ı cihân  
Ol sadeplerde dürer gibi nihân
- 1201) Menzilin buldı çü seyyâreleri  
İtdiler âyineler hâreleri
- 1202) Her biri meskeni renginde harîr  
Geyüp ol reng ile zeyn itdi serîr
- 1203) Hâne-i esbâb dahı her ne ki var  
Cümle ol reng ile olmuşdı nigâr
- 1204) Kankı kasra ki vara şâh-ı cihân  
Giyer ol renk libâsını hemân
- 1205) Ol gice anda sürüp zevk u safâ  
Gösterirdi ana âyîn-i vefâ
- 1206) Yedi günde idüben devri temâm  
Yine başlar idi ol serv-i hırâm
- 1207) Deyre dönmişidi her kasr hemîn  
Sanma benzer içinde büt-i Çîn
- 1208) Yokdurur bütde kemâl ile cemâl  
Vardur anlarda cemâl ile kemâl
- 1209) Yokdurur bütde letâfet ile hân  
Bunların her birisi serv-i revân
- 1210) Toldı hûrîler ile çünki kusûr  
Kalmadı buldı kemâlini kûsûr
- 1211) San sanem-i hân idi hânları  
Büt-ı Azer idi cânânları

- 1212) Gül-i gûyâ ile şîmşâd-ı revân  
Eyledi sahn-ı gülistânı cinân
- 1213) Gül idi her nereye olsa nazar  
Lâleyidi nereden olsa güzer
- 1214) Oldı cennet içi hûr ile pür  
Her biri lutfda bir dâne-i dürr
- 1215) Dâmeninden oluben müşk-i demân  
Nefesi her birinün nâfe-feşân
- 1216) Buldı kevkebler ile zeyn-i cinân  
Âsumân oldı zemîn yer âsumân
- 1217) Toldı micmer gibi ‘ûd ile nühûr  
Her biri eyledi bir yerde huzûr
- 1218) Gördi Rıdvân anı germ oldı temâm  
Cenneti terk idüp itdi ana cân
- 1219) İtdi cârû ana zülfîni peri  
Toldı her bâgun içi kebk-i deri
- 1220) ‘Arz idüp her biri bir dürlü cemâl  
Eyledi meskenini ‘adn-misâl
- 1221) Çekilüp dâmen açıldıkça büjûl  
Şâd olurdu gören olursa melûl
- 1222) Matla’-ı şems idi her menzil-i hûb  
Lîk anda yine eylerdi gurûb
- 1223) Heft-seyyâre ile heft felek  
Zeyn olur niteki gerdûn u melek
- 1224) Şem’ler virdi şebistânlara nûr  
Oldı pervâne görüp anları hûr

BEZM - ARÂSTEN-İ BEHRÂM ŞEB-İ ŞENBÎH  
DER-KÜNBED-İ MÜŞK FÂM

- 1225) Şeb-i şenbîhde ki kadr idi hemân  
Kasr-ı müşgîne gider serv-i revân
- 1226) Turra-i şeb oluben müşk-feşân  
Hokka-i nâfeye dönmişdi cihân

- 1227) Hızır idi istemege âb-ı hayât  
Oldı ol kasr ana gûyâ zulümât
- 1228) Çeşme-i cân bulup itmege nûş  
İtdi kanı mey-i tâze gibi cûş
- 1229) Nûr-ı zulmetde bulunmasa eger  
Kimse ol renge ider miydi nazar
- 1230) Geydi abâsı libâsın şeh-i şark  
Gicede mehden olunmaz idi fark
- 1231) Geydügi başdan ayak cümle siyâh  
‘Anberin câmeyidi müşk-i külâh
- 1232) Gâliye fâm oluben virdi selâm  
‘İzzetiyle turuben Tûbî-hırâm
- 1233) Karşuladı idüben işve vü nâz  
Kadr-i muhyine olur zülf-tırâz
- 1234) Mihr idi lîk sehâb içre nihân  
Tal’at-ı lem’ası amma ki ‘ayân
- 1235) Zeyn idüp berk-i benefşe semeni  
Sûsen ârâyış ider yâsemeni
- 1236) Yokdur elvânda mânend-i siyâh  
İtdi takdîm anıniçün anı şâh
- 1237) Siyeh olmasayidi zülf ile âl  
Hüsne virür miyidi bunca kemâl
- 1238) Gerçi tîre görünür müşk-i Hoten  
Kadrini kıymetin anun göresen
- 1239) Yiri geh sînede vü başda gehi  
Fark ile sîne dür ârâm gehi
- 1240) Zeyn ider mushafı görince midâd  
Kadr- efzûn olur oldukça sevâd
- 1241) Kara taş içre olur la’l nihân  
Cevhere tîreligi lîk nişân
- 1242) Cümle elvâne eger olmasa şâh  
Ka’benün ortası olmazdı siyâh

- 1243) Mûmiyâ tîredür ey ehl-i nazar  
Tâzeler haste ola çünkü ciger
- 1244) Yesirün olduğu çün reng-i siyâh  
Buldı sübha oluben ‘izzet ü câh
- 1245) Elin eline alup oldu revân  
Dil-berün tahtına sultân-ı cihân
- 1246) Abanûs idi serîri de siyâh  
Çıkdı oturdı şehinşâh ile mâh
- 1247) Getürüp ortaya nukl ile şarâb  
Def’î kebg ile tezerv oldu kebâb
- 1248) Bir iki kerre ki devr eyledi mey  
İstedi şâh-ı cihân bir bat u ney
- 1249) Mutrib-ı hûş-nefes ü hûb-hısâl  
Ele sâz aldı vü ‘arz itdi kemâl
- 1250) Başladı itmege feryâd u figân  
Eyledi dildeki esrârı ‘ayân
- 1251) Germ ider çünkü şehi bâde vü sâz  
Eyledi destini çün zülf-i tırâz
- 1252) Şevk ile mâhı ider bûs u kinâr  
Başladı şîve vü kınışa nigâr
- 1253) Gitdi seyyâreleri oldu nihân  
Mâh ile kaldı hemîn şâh-ı cihân
- 1254) Sarmaşup yatdılar oldu ki hâb  
Şâh idindi lebini nukl u kebâb
- 1255) Tokınup sînesine ol iki sîb  
Cümle a’zâsı ider nâz u firîb
- 1256) Emişüp kocuşurak didi nigâr  
‘İzz ü ikbâl ola dâyim şeh-i yâr
- 1257) İrmesün devlet ü ‘ömrüne gezend  
Bin perestâra peder itdi çü pend
- 1258) Didi çünkim olasın şâha karîn  
Eyle dâyim ana bu pendî hemîn



- 1259) Ki işi dâym ola ‘adl ile dâd  
Bâr olmaya ana hakk-ı ‘ibâd
- 1260) Şâh olan çünkim ide cevır ü sitem  
Çekilür defter ü ‘ömrine rakam
- 1261) Evvelâ ‘adli sorar çünki İlâh  
Farzdur her kişiye kim ola şâh
- 1262) Birdür anda çü gedâ ile emîr  
Sakın incinmeye zinhâr fakîr
- 1263) Seni şâh itmiş iken halka Celîl  
Bir dilenciye niçün ide zelîl
- 1264) Ana kim olmaya şahlıkla hemâl  
Pây-mâl ola niçün mûr misâl
- 1265) Olmaya çünki ulu’l-emrde dâd  
Hâr ider âhir anı hakk-ı ‘ibâd
- 1266) Zâlim olanun olur ‘ömri çü az  
‘Akil olan dileye ‘ömr-i dırâz
- 1267) ‘Âbid olmakdan ise sâl ile mâh  
‘Âdil olmak yeg olan kimseye şâh
- 1268) ‘Adl u ihsân çü emr itdi Hudâ  
İmtisâl ide şu kim ‘âkil ola
- 1269) ‘Adldür şehlere mâl ile sipâh  
‘Adldür belde kemer başda külâh
- 1270) Küfr ile olmadı bir mülk harâb  
Niçe sultânları zulm itdi türâb
- 1271) Al sana vâcib olan hakkı hemîn  
Kimsenün mâlına el sunma sakın
- 1272) Mâr olur mâlı sokar sonra seni  
An kefen-dûzı ve hem gör küheni
- 1273) ‘Adldür şehlere tîg ile siper  
‘Adli yok şâhda olmaya hüner
- 1274) Çeşm ü gûşı şehün olmasa cihâr  
Mülk-i ‘adl ile kaçan tuta karar

1275) Şâh olan çünki vire zulme rızâ  
Lâ-cerem Hak'dan irer mülke kazâ

1276) Zulme çün el uzada şâh-ı cihân  
Kahtlıktan ola vîrâne cihân

### HİKÂYET

1277) Râylarda var idi bir ulu şâh  
Hinde olmuş idi 'adl ile penâh

1278) Kendüye 'adli idinmişdi şî'âr  
Gâyet âbâd idi dâd ile diyâr

1279) Şehd-i hâne gibi pür mülk-i ni'am  
Reşk ider olmuş idi Mısır u 'Acem

1280) Çok belâ çekmiş ü görmüşdi zamân  
Cümle ma'lûmıydı hâl-i cihân

1281) 'Adl-i Kisrâ'yı unutturdı temâm  
İ'tirâf itdi ana hâss ile 'âm

1282) Remeye olmaz ise dahı şebân  
Zîb itmez idi devrinde zebân

1283) Gûr vehm ide deyü şîr u jiyân  
Kendüyi itdi neyistânda nihân

1284) Ugramayam deyu âhûya peleng  
Mesken idinmiş idi kulle-i seng

1285) Pîl-i Hindû ne kadar kim ola mest  
Pây-ı mûra dahı virmezdi şikest

1286) Ne kadar var ise mülkinde sipâh  
'Adl-i cûyide çü 'âdil idi şâh

1287) Kimseye bakmaz idi hiç hakîr  
Bir idi ana fakir île emîr

1288) Yogidi kâlîme hergiz nazarı  
Eger olsa dahı kendü püseri

1289) Her ki düzd ola veya ide sitem  
Destini tîg ile eylerdi kalem

1290) Dâyim eyler idi tagyir-i libâs

- Ta tefahhüs ide neydüğünü nâs
- 1291) Kimse bilmezdi anı sâyir idi  
Şehri tulab gibi dâîr idi
- 1292) Kande kim iki kişî itse kelâm  
Neyidüklerin işidür ü temâm
- 1293) Kime zülm oldugun işitse hemân  
‘Adl iderdi buluban şâh-ı cihân
- 1294) Bunı ‘âdet idünür nîçe zamân  
Oldı bu kâr ile ma’mûr-ı cihân
- 1295) Ki Züleyhâ gibi yok ana nazîr  
Oldı sultân-ı cihân iken esîr
- 1296) Kâmet-i serv idi ruhsâri semen  
Cebhesi berk-i gül ü gonce-dehen
- 1297) Cismi terlikde çü pâîda-ı ter  
Meyl ider her kişî kim ide nazar
- 1298) Terligi şîşe idi cism-ı gülâb  
Ab-gîne ola mı aba hicâb
- 1299) Câ-yı âli ola mahbûba ola  
Nice âdem ola kim sabr kıla
- 1300) Gamzesi tîr ü kaşı câcî kemân  
Didi ey sîm-beden serv-i revân
- 1301) Boynını çekdi vü gögsünü kakar  
Germ olup dikkat ile ana bakar
- 1302) Oda yakanına hıdmet idelüm  
Ya sizün câ-yı şerîfe gidelüm
- 1303) Yüzimün üstine bas tek kademün  
Kademünle bile gelür kıdemün
- 1304) Yoluna harç ideyüm mâ- melegüm  
Ey peri yüzlü begüm hey melegüm
- 1305) Katı bî-yâr idüm ol yâr bana  
Ne sadâkatlar idem gör ki sana
- 1306) İncinüp eyledi hışm ile nazar

- Didi kim Hind şehi oldu meger
- 1307) Yoluna git yüri incitme beni  
Odlara yakdururam yoksa seni
- 1308) Oda yakar kime kim itse ‘itâb  
Yürü var eyleme kendüne ‘azâb
- 1309) Olmasayıdun eger bunda garîb  
Sâdir olmaz idi bu fi’l-i ‘acib
- 1310) ‘Adl u dâdını şehün bilsen eger  
Eylemezdün bana bu resme nazar
- 1311) İtdigün itmeyelüm sana hele  
Nev-civânsın yüri yoluna gele
- 1312) Sözüni işidicek şâh-ı cihân  
Terk idüp oldu visâkına revân
- 1313) İtdügi işe olur kalb-i hazîn  
Nefsine eyledi âyin deyü kîn
- 1314) Cürmden eylemege defter-i pâk  
Kasd ider kim ide kendüyi helâk
- 1315) Kendüyi yakmaga idindi murâd  
Halk gördi ki olur şûr u fesâd
- 1316) İttifâk ile guluvv itdi sipâh  
Komadılar ki yaka kendüyi şâh
- 1317) Cebr kılmasaydı halk-ı cihân  
Çün semender oda itmiş idi cân
- 1318) ‘Adl böyle gerek ey şâh-ı zamân  
Zulmden tâ ki emin ola cihân
- 1319) Zulme bir kerre ki igmâz ide şâh  
‘Âdet idünür olur sonra sipâh
- 1320) Fâyide itmez olur sonra gazab  
Cümleye olmuş olur kendü sebeb
- 1321) Şöyle didi vü şehi itdi du’â  
Virdi pendî dahî bir dürlü safâ
- 1322) Germ olup sözlerine şâh-ı cihân

Basdı bagrına anı niteki cân

- 1323) Çünkü mahbûba olur şehd-i makâl  
Lutf-i güftâr virür hüsne kemâl
- 1324) Bu fesâneyle uyur şâh-ı cihân  
Câna cân sarılur ol serv-i revân
- 1325) Subh olıcak yine zeyn itdi serîr  
Maslahat her ne ise gördi vezîr

MECLİS -SÂHTEN-İ BEHRÂM-I GÛR  
ŞEB-İ YEK-ŞENBÎH DER-KÛNBED-İ KÂFÛR

- 1326) Şeb-i yek-şenbih olur çün ki hâb  
Kalmadı gökde çü nevrûz-ı sehâb
- 1327) Mihr-i tâbına dönüp tâb-ı kamer  
Necmde olmuş idi hıyre basar
- 1328) Sun'-ı kandîl ile zeyn oldı felek  
Tâbına üşdi çü pervâne melek
- 1329) Ebkem olmuşdı vü hûş ile tuyûr  
Kasd ider her kişi kim ide huzûr
- 1330) Geldi yâdına şehün kasr-ı sefid  
Fikri bu kim içe yâr ile nebîd
- 1331) Tâk-ı sîm-âba ider 'azm çü mâh  
Âsumân sûda idüp taraf-ı külâh
- 1332) Geydügi başdan ayak cümle sepîd  
'Ârızı ser-hadi amma çü nebîd
- 1333) İşidüp geldüğini şâh-ı cihân  
Nâz ile karşı çıkar serv-i revân
- 1334) Yüz sürer pâyine mûre gibi mâh  
Nitekim servün ayagina giyâh
- 1335) Geydügi başdan ayak berk-i semen  
Ak güle dönmüşidi gonce-dehen
- 1336) Sîm-i âmîde libâsı teni dūr  
Yâ meger şîşe idi âb ile pūr
- 1337) Mâyi içinde teni sîmi hemân

- Mâhı sîm idi su içre nihân
- 1338) Meh-i çîn idi melek manzar idi  
Sanki âyînedeki peyker idi
- 1339) Gördigin sihr ile şîşeye perî  
Görmeyen görse o sîmin-berî
- 1340) Çenberî hâle idi ‘ârızî mâh  
Yâsemen idi başındagı külâh
- 1341) Târ idi beli dūr içinde hemân  
Gâyet-i lutfdan olmazdı nihân
- 1342) Âşiyânına gelüp bâz-ı sepîd  
Nâzenini görüben oldı şemîd
- 1343) Şâhın önine düşüp oldu revân  
Şem’-i kâfûri idi sanki hemân
- 1344) Şîr-i berfîne idi şâh-ı cihân  
Bâ-revân oldu meh ardunca revân
- 1345) Taht-ı ‘âc üzre çıkup sîm-beden  
Kıldı ‘Îsâ gibi hurşîdi vatan
- 1346) Menzil-i âbıyidi sanki serîr  
Yâ dü peyker idi ol iki münîr
- 1347) Sîm-destine olup câm-ı bilûr  
Sundı kevser deyü rıdvânına hûr
- 1348) Câm-ı billûrun içindeki nebîd  
Âb-ı Kevser gibi şîrîn ü sefid
- 1349) Ak olup mey çün ola sâfi vü pâk  
Yok humârından anun zerrece bâk
- 1350) Şîşesi dūr idi vü hamrı gül-âb  
Tâb virüp meh virdi şehe tâb
- 1351) İçilüp mey ney ider çünki figân  
Germ olur mâha katı şâh-ı cihân
- 1352) Yüze mey tâb getürdi göze hâb  
Devşürildi yine esbâb-ı şarâb
- 1353) Gitdi sâkisi vü sâzendesi hem

- Mâh-ı Rûm ile kalur şâh-ı ‘Acem
- 1354) Câme-hâbın döşeyüp hûr-i cinân  
Bister-i âhenge ider nâfe-feşân
- 1355) Soyınup yatdı nigâr ile dilîr  
Oldı hem-hâbe ol âhû ile şîr
- 1356) Leb-be-leb sîne-be sîne iki yâr  
Yok ara yirde kumeys ile izâr
- 1357) Cümdler lu’bile şâhı gehi mâh  
Ki kucaklar mâhı bâzi ile şâh
- 1358) Dest-bâzi idüben niçe zamân  
İtdiler kande mükerrerce nişân
- 1359) Lu’bdan sonra didi gonce-dehân  
Devletün dâyim eyâ şâh-ı cihân
- 1360) Çarh döndükçe tur ey kutb-ı zamân  
İtmesün gam okı kaddüni kemân
- 1361) Göndericek pîlini bu yana peder  
Şöyle ısmarladı ey ‘âli-güher
- 1362) Didi çün şâha mülâki olasın  
Bizden anlara du’âlar kılasın
- 1363) Bir nasîhat virem unutma sakın  
Diyessin şâha buluşıcak hemîn
- 1364) Farzdur çünki selâtine sehâ  
Devlet anun kim şî’ârı ol ola
- 1365) Olur ihsâna çü insân ‘abîd  
Gözünü virmek ile eyle mezîd
- 1366) Kimsene eylemeden sana su’âl  
Eyle ihsân budur cûda kemâl
- 1367) Perdedür cümle-i ‘ayba sehâ  
Setr kıl ‘aybunı itmekle ‘atâ
- 1368) Hatem olmadı cihân mülkine şâh  
Geymedi başında gerçi kim külâh
- 1369) Lîk kesb eyledi bir nâm u nişân

- Ki unudulmaya turdukca cihân
- 1370) Devleti bir şehün olmasa büleñd  
Vakt-i hâcette ider halkı neñend
- 1371) Halka muhtâcdur elbet daâi şâh  
Nice muhtâc ise kendüye sipâh
- 1372) ‘Âlemün sîm u zerin eyleme çîn  
Vir ki oldur kalanı sana hemîn
- 1373) Zer-perest olma ki mergûb olasın  
Cümle ‘âlem seve mahbûb olasın
- 1374) Virmek eyler kişiyi düşmeni yâr  
Sevmeyen dahı sever bi-ihitiyâr
- 1375) Kîse mi kimse şehâ viren eli  
Çok işitdük bilürüm bu meseli
- 1376) Çünkü virür birine Tanrı hezâr  
Bire bin ala tûcârında ne var
- 1377) İder imsâk kişiyi çü hakîr  
Bir olur vermeyicek şâh-ı fakîr
- 1378) Toludur mahzen-i gaybun içi nakd  
Eyleme kise gibi dostuna ‘akd
- 1379) Yumıcak rezmd e yum desti şehâ  
Bezm de olsa tehî dest-i hata
- 1380) Dest-beste usa sanduk misâl  
Getürür âdeme çok dürlü zevâl
- 1381) Her kişi senden ider çünkü ümîd  
Eyleme destüni zinhâr kilîd
- 1382) Eyle engüşkini miftâh-ı ni’am  
Olmaya tâ şehün âli şikem
- 1383) Hiç Karûn’a müfid oldu mu zer  
Gerçi gerd eyledi çok la’l-i dürer
- 1384) Himmet-i ‘âli olup desti küşâd  
Olmasa serv ola mı hurrem ü şâd
- 1385) Kân ider sîm-i zeri gerçi nihân



Çâk ider sînesini dest-i zamân

- 1386) İktibâkun sebebi cem'-i derem  
Mûcib-ı bast u tarab bezl ü kerem
- 1387) Kişinün genc-i çini olsa hemân  
Kılmasa buldığını defn ü nihân
- 1388) Yi bitür varise koma zeri sen  
Kendüne eyleme dünyâyı vesen
- 1389) Mihrveş lutfunı kıl 'âleme 'âm  
Olmaya şehlik adı tâ ki harâm
- 1390) 'Avrete oglana bezl eyleme zer  
Ana vir kim ola ol ehl-i hüner
- 1391) Şehlerün dâd u dihişdür hüneri  
Zîveri hil'atı tâc ü kemeri

#### HİKÂYET

- 1392) Rûmda var idi bir şâh-ı cevâd  
Kim çıkarmış idi ol dâd ile âd
- 1393) Kara toprakça tutup sîm u zeri  
Kuma saymaz idi hergiz düreri
- 1394) Himmet-i 'âli idi kadri 'akîm  
Hâtem-i Tayy gibi gâyet de kerîm
- 1395) Hükûm iderdi yedi iklîme temâm  
Felegün kâsesi destinde çü câm
- 1396) 'Âleme nef'ide mânend-i sehâb  
Âfitâb ide kefin görse hicâb
- 1397) Milketinde yogidi hiç su'âl  
Bir idi mîr ü gedâ çün dege mâl
- 1398) Kâyıl olmaz idi bir sâyıl ola  
Ya gedâ ola zere mâyl ola
- 1399) Memleket fethine savb itse 'inân  
Ele almaz idi tîr ile kemân
- 1400) Cûdını işidüben halk hemîn  
Cümle râm olup öperler diremîn

- 1401) Bu tarîk ile olup âleme şâh  
‘Adl u dâd olmuş idi ana külâh
- 1402) Didi oğlu ki eyâ şâh-ı cihân  
Hükmüne râm zemîn ile zamân
- 1403) ‘Âleme şâh olaludan berü sen  
Almadun elüne şemşîr u mecen
- 1404) Bu cihân mülkini tutmaga sebab  
Hikmeti ne bilemez kimse ‘aceb
- 1405) Tîgdür mülk-küşâ hasm-şiken  
Almadun destüne bir gün anı sen
- 1406) Gelüben didi ki ey cân peder  
Bir olur erde meseldür bu hüner
- 1407) Almadum gerçi ele tîg u kemer  
Halka dâm eyleyüben sîm ile zer
- 1408) Eyledüm dilleri anun ile râm  
Oldı ‘âlem bana münkâd temâm
- 1409) ‘Âlemi eyledi teshîr-i sehâm  
Cân ile sevdi beni hâss ile ‘âm
- 1410) İster isen ki seve halk seni  
Bir nasîhat ideyüm dinle beni
- 1411) Zeri sevme ki seni halk seve  
Yolına ölmege her kişi ive
- 1412) Tevbe-reh olsa tehî var bu mesel  
Ki tutulmaz ana esb ile cemel
- 1413) Her neye kâdir isen eyle nisâr  
Göresin niçe olur feth-i diyâr
- 1414) Bu kişinün yimegin on kişi yer  
Ni’metün bezl kıl oldur ki hüner
- 1415) Ne kadar virsen olur dahı ziyâd  
Fazla bu adun olur bâr-ı cevâd
- 1416) Dûzaha girmez imiş çünki sahî  
Bundan artuk ne ola nef’ü vahî

- 1417) Cennete girmez imiş çünkü bahîl  
İtme imsâk ile nefsi zelif
- 1418) Belki şöyle gerek ey şâh-ı sahâ  
Ki cihân râmî vü münkâd ola
- 1419) Eyledi böyle diyüp şâha du'â  
Bir hulûs ile ki olur def'-i revâ
- 1420) Şeh bu pendini begendi vü öper  
Leb-i nukli sunar agzına şeker
- 1421) Bu hikâyet olup efsâne-i hâb  
Lezzet ile uyudur hem-çü şarâb
- 1422) Subh olıcak yine ol mihr-i münîr  
Oldı arâyış-i dihîm-i serîr
- 1423) Şâhlık resmiyle tâ geh-i şâm  
Maslahat her neyise gördi temâm

SOHBET-İ BEHRÂM ŞEB-İ DÜŞENBİH DER  
KÜNBED-İ LA'L-FÂM VE MUSÂHEBET-İ BÂ  
DİL-ARÂM-I GÜL-ENDÂM

- 1424) Çün düşenbih gicesi şâh-ı cihân  
Tak-ı la'lîne diler ki ola revân
- 1425) Götürür şem'ini bir serv-i revân  
Gider ardınca anun meş'al-i cân
- 1426) Karşuladı şehi bânû-yı 'Acem  
Künbed-i sürha girür vâris-i Cem
- 1427) Erguvân olmuş idi serv-i hırâm  
Lâleveş aldı ele destine câm
- 1428) Pür idüp lâle için la'l-i müzâb  
Zeyn için meclise kebk oldı kebâb
- 1429) Câme-i sürh ile ol âfet-i cân  
Mihr idi sanki şafak içre nihân
- 1430) Âteş içinde Halîl idi meger  
Eylemez âteş ana hiç zarar

- 1431) Nâzenîn cismi leâfetde çü cân  
Lâle câmindaki jâleydi hemân
- 1432) Berk-i gülnâr idi san birisini  
Gül severidi biri yâsemeni
- 1433) Yine sâzende alup destine ‘ûd  
Çaldı yırladı hoş-âyende sürûd
- 1434) Ni’met ile toluban tak u sarây  
Oldı elhânı anun şevk-i ferây
- 1435) Yeyüp içüp idüben ‘ayş u neşât  
Devşürildi şehün emriyle simât
- 1436) Câme-hâbına girüp şâh-ı ‘Acem  
Bir zamân sürdi düşekde dahı dem
- 1437) Didi dil-ber ki eyâ şâh-ı zamân  
Haşre dek râm ola emrüne cihân
- 1438) Dimege sizlere bir niçe haber  
Bana ısmarladı tekrâr peder
- 1439) Didi kim şâha şecâ’at de gerek  
Zen olur olmasa bir erde yürek
- 1440) Yedi iklîm açılır çün ola seyf  
Şâhlık oldı cebân kimseye hayf
- 1441) Gökden indi bu mesel var ki cedîd  
Oldı ser-keşler anun ile ‘abîd
- 1442) Eceli olmayan olmaz çü şehâ  
Vehm kılma ölicez rûz-ı vefâ
- 1443) Şâh olan cengden eyliye çü bîm  
Lâyık olmaz ki giye başa dihîm
- 1444) Şîri gör kim seg olur ise hezâr  
Üşenüp vehm ile tutar mı kinâr
- 1445) Gel a gör ola cünd anun füzûn  
Sanma yüz döndüre yüz ola zebûn
- 1446) Olsa âhûdan eger deşt içi teng  
Hak ider anı görüp bebr ü peleng

- 1447) Bir zegan olsa eger çarh-i berîn  
Çıkuban tagıda bir bâz-ı haşîn
- 1448) Olmasa şâhin eger ehl-i şikâr  
Ele mi alur idi anı kibâr
- 1449) Gürg tenhâda eger bulsa müyûn  
İder elbette şu hâl ile zebûn
- 1450) Peşşede olmag ile sûzen-i nîş  
Turamaz hamlesine gör nice mîş
- 1451) Hasmun açdurma gözin virme amân  
Ya kaçâ ya dileye bâri amân
- 1452) Hasmunâ çünki mukâbil varasın  
Cehd kıl ol anı sen urasın
- 1453) Cüst olmak gerek itdükde kıtâl  
Bulmaya tâ ki ‘adû sana mecâl
- 1454) Tutmaga bilmeyicek tîg u kemân  
Yük olur kişiye esbâb hemân
- 1455) Esbini itmeyicek bir kişi râm  
Dâr u gir itmek olur ana harâm
- 456) Merd olan bilmeye tutmaga ‘inân  
Nedir eline alup bâri sinân
- 1457) İtmeyen kendüzine erligi fen  
Takınup neyliye tîg ile mecen

#### HİKÂYET

- 1458) Tutdı dünyâyı Sikender çü temâm  
Oldı mahkûmı anun Mısır ile Şâm
- 1459) Tîgının râm olup bahr ile ber  
Nereye vardiyise buldı zafer
- 1460) Geldi tahtına idüp geşt-i cihân  
‘Ayş u nûş itmege başladı hemân
- 1461) Hasımı yogıdı ki ideydi hazer  
Sohbet idi işi her şâm u seher
- 1462) Bir gün itdi ana bir kimse su’âl

- Didi ey câmi’-i envâ’-ı kemâl
- 1463) Hulk olaldan berü kevn ile mekân  
Gelmedi sencileyin şâh-ı cihân
- 1464) Eyledün gerçi mülûk ile kıtâl  
Olmadı kimse sana lîk hemâl
- 1465) Kande vardunsa kodun nâm u nişân  
Gelmedi nâmuna bir yirde ziyân
- 1466) Didi ne denlü itdümse kıtâl  
Hasm bulmadığı bu bana mecâl
- 1467) Turmada süst idüm ü varmada cüst  
‘Âlemi tutdum anun ile dürüst
- 1468) Hasmdan itmez idüm derece bâk  
Kalmaz idüm çü zebûn ola helâk
- 1469) Kankı şehde k’ola fi’l-cümle sebât  
Vartalardan bulur elbette necât
- 1470) San’at oldu bana bu ceng-i cidâl  
Kesb olur görmek ile cümle kemâl
- 1471) Olmasaydı eger bende ciger  
Korkar idüm görecek tîg u teber
- 1472) Bana olmazdı müyesser bu celâl  
Pâdişehlikda bulunmazdı kemâl
- 1473) Hak budur virmeyecek lîk Hudâ  
Kişinün sa’yi olur cümle hebâ
- 1474) Kendü olur elde olan tîg u teber  
Remh-i şâmi görünür hasma eber
- 1475) Virmek Allah’a yaraşur çü zafer  
Bir behânedür ara yirde teber
- 1476) Kâh olur cüz’-i bahâneyle ‘adû  
İrişür nasr dutar kaçmaga rû
- 1477) Sipehü sa’y ile olmaz bu zafer  
Dâd-ı Hakdur vire Allah meger
- 1478) Çün temâm itdi sözün zümre-i cîn

- Şâh-ı Behrâm olur hâb hemîn
- 1479) Öpüben bagrına basup sanemi  
Dilde kalmadı bu devrân gamı
- 1480) Ne safâdur ola hem-hâbe habîb  
Tokına sînene nârenc ile sîb
- 1481) Uyanup geh öpesin geh kucasın  
Geh serin ohşayasın geh uçasın
- 1482) Subha dek şeh kuçuben itdi huzûr  
Nukl-ı kevser idi hem-hâbesi

MECLİS-ARÂSTEN-İ BEHRÂM ŞEB-İ DÜ ŞENBÎH  
DER KÜNBED-İ ZÜMÜRRÜD-FÂM

- 1483) Çün se-şenbih gicesi togdı kamer  
Şeh turup künbed-i hazrâya gider
- 1484) Lu'bet-i hûrveş Çîni-nijâd  
Karşuladı şehi ikrâm ile şâd
- 1485) Hûriye dönmüş idi serv-i revân  
Ravza-i cennet idi kasrı hemân
- 1486) Müntehâ kaddi anun Sidre- misâl  
Hüsninün cennetine virdi kemâl
- 1487) Cennet içinde tutup Tûbâ- makâm  
Ravzada eyledi tâvûs-hırâm
- 1488) Şâhun eylemege gönlini şikâr  
Sebzler giymiş idi yine nigâr
- 1489) Sebz idi takı çü eyvân-ı felek  
Dil-ber içinde yeşil perlü melek
- 1490) Şem'-i kafûriyidi gerçi ki yâr  
Lîk zengâr ile olmuşdı nigâr
- 1491) Tûti-i sebz idi güftârı şeker  
Dökilür söyleyicek la'l u dürer
- 1492) Sebz-pûş oldığı bu serv-i revân  
Resmdür hulle giyer hûr-ı cinân
- 1493) Hızr u etile gider gussa vü gam

- Sebze meyl itdügi bu şâh-ı ‘Acem
- 1494) Câme pirûzec idi târ-ı miyân  
Târ-ı piruzeci içinde nihân
- 1495) Başmadan çıkaydı tak-ı hümâ hemîn  
Dil-ber içinde çü pirûze-nigîn
- 1496) Dönüben mâh-ı zeber-hadd saneme  
Kible-gâh oldu emîr-i ‘Aceme
- 1497) Câme olmaz idi cismine hicâb  
Hâyıl ola mı mehe sebz-i sehâb
- 1498) Câme-i sebz ile ol serv-i hırâm  
Sebze de Tûbâ gibi tutdı makâm
- 1499) Çü çıkar tahtına sultân-ı cihân  
Oturur yanına ol serv-i revân
- 1500) Gonce lebler düzilür serv-misâl  
‘Arz ider her biri gül gibi cemâl
- 1501) Her biri kebg-i deri kasr-ı çemen  
Ruhları berk-i ter içinde hemen
- 1502) Sâki-i hazrası vü ‘Îsâ-nefes  
Câm-ı pirûzeci pür eyledi bes
- 1503) Sunuben eyledi Behrâma du’â  
Nûş idüp toldı dil ü cânı safâ
- 1504) Nukl içün virdi lebin agzına mâh  
İtdi şîrîn dehenin nukl ile şâh
- 1505) Aldı kânûn eline nagme-serây  
Başladı nagme-i eşvâk-ferây
- 1506) Çaldı çağırdı idüp sohbet-i germ  
Nicesin seng-i dilün eyledi nerm
- 1507) Tutdı âheng ana ma’nî vü zübâb  
Ol sürûd ile olur devr türâb
- 1508) Virdi rakkâsları bezme seref  
Başladı tutdı usulü kef u def
- 1509) Şevk ile sîne döger gördi çü def



- Germ olup çaldı celâcil daâi kef
- 1510) Yandı pervâne gibi şem’-i münîr  
Döndi gerdûne ziyâsıyla serîr
- 1511) Devr idüp bir niçe kez bâde-i nâb  
Getürür her kişinün çeşmine hâb
- 1512) Câme-hâbına girür şâh-ı cihân  
Oldı hem-hâbesi ol mâye-i cân
- 1513) Didi dil-ber ki eyâ şâh-ı cihân  
‘Âlemün emn ü emânîne zemân
- 1514) Yâr ola ‘ömrüne ‘izz ile celâl  
İrmiye gönlüne ‘âlemde melâl
- 1515) Dirile hazretüne müddet-i Nûh  
Haşre dek eyleyesin feth ü fütûh
- 1516) Bir nasîhat dimiş idi bana bâb  
Şerh olunsa ola her bâb kitâb
- 1517) Şehlere didi siyâset de gerek  
Ki siyâset olur insâna mihek
- 1518) Yenemez lutfla bu halkı kişi  
Geh siyâset gehi lutf olsun işi
- 1519) Çün siyâsetsüz olur mülk harâb  
Müstehak olana bes ile ‘azâb
- 1520) Düzd ü tarrâr olana virme amân  
Ki fesâd ider olur bulsa zamân
- 1521) Şâha rûze ne fûz olsa revâ  
Ki kazâ olur anun ile kazâ
- 1522) Şer’e kıl ‘örfünü geh gâh karîn  
Fitneden tâ ki halâs ola zihîn
- 1523) Hamldür gerçi ki âdemde kemâl  
Kesiretlik ider naks-ı celâl
- 1524) Hoş-sıfatdur bilürem hilm ü cemâl  
İ’tidâli gözet oldur ki kemâl
- 1525) Râzi olma ki göre kimse elem

Kılmasun bendelerün halka sitem

- 1526) Şâhlık buldı siyâsetle nikâm  
Çok olur puhteler içinde ki hâm
- 1527) Nefs-i nefsi olıcak mîr ü sipâh  
Halk pâ-mâl ola mânend-i siyâh
- 1528) Memleket tîz olur anunla harâb  
Pür olur âdemi yerine ‘azâb
- 1529) Rehber-i dûzah ola her ki sana  
Oglun olur ise rahm itme ana
- 1530) Emr-i Hakdur çün siyâset idesin  
Emr-i şer’ ile olan fi’l-i cîn
- 1531) ‘Âleme oldı siyâset çü esâs  
Gayr-ı ‘âdetlere eyleme kıyâs
- 1532) Hârven-i bâgun içi olmasa pâk  
Bâgbânun ide dâmânını çâk
- 1533) Kişinün çün ola cîbinde yılân  
Gözedür şeh-tamarı ki ide nişân
- 1534) Zulme vü zâlime meyl itme şehâ  
Farzdur zâlime tehdîd ola
- 1535) Olmasaydı eger şâh-ı zamân  
Biri birin yer idi pîr ü cüvân

#### HİKÂYET

- 1536) Bir hikâyet didi dâna-yı umûr  
Dimeyem gelmez ise kalbe fütûr
- 1537) Çinde var idi bir şâh-ı cihân  
Ki emîn idi zamânında zamân
- 1538) Yog idi ana siyâsetde nazîr  
Saltanat ‘ilminde dâna vü habîr
- 1539) Bir begi var idi eylerdi sitem  
Çekdiler hayli re’âyâsı elem
- 1540) Ne kadar kıldıysa çevr ü sitem  
İtdiler defterini cümle rakam

- 1541) Sundılar şâha yazup rik'a- misâl  
Göricek geldi celâlidî celâl
- 1542) Da'vet eyler kapusına anı şâh  
Kasdı bu kîm gelicek ide tebâh
- 1543) Havf idüp kendüzini itdi nihân  
Bulamadı arayup şâh-ı cihân
- 1544) Anı terbiyyet iden kimseyi şâh  
Kasd kıldı ide yirine tebâh
- 1545) Didiler ana ki ey şâh-ı serîr  
Ne günâh itdi bu üftâde fakîr
- 1546) Bilürtüz anı bu itmedi günâh  
Yok yire kana ne içün gire şâh
- 1547) Hûn-ı nâ-hâk niçe taht itdi harâb  
Günehi olmayana kılma 'azâb
- 1548) Didi ol zâlîme çok oldu mu'în  
Zulmı bu itmiş olur halka hemîn
- 1549) Bu sebeb oldu anı itmege mîr  
Eylerem yirine ben bunı hakîr
- 1550) Bir kişi kim idine kâlimi yâr  
Zulmle anun da belki kim meyli var
- 1551) İhtiyâri degül ol meyl ana  
Bâ'isi yok anun illâ irtişâ
- 1552) Nefsine ya bana eylese günâh  
Hışm idüp itmez idüm anı tebâh
- 1553) Hakk-ı gayr oldu çü yok çâre ana  
İderem vâcib olan neyse bana
- 1554) Bulına deyü kim itdiyse günâh  
Habs iderler anı emr eyledi şâh
- 1555) Niçe müddet oluban habse emîr  
Habsün elemini çok çekdi vezîr
- 1556) Hikmeti gör ki olan kimse nihân  
Kendüyi bir gün eder yine 'ayân

- 1557) Tutdılar anı vü itdiler esîr  
Saldılar mahbese vü kıldı vezîr
- 1558) Suçu ‘afv oldu vü varıldı hemân  
Asdılar ol begi virmedi amân
- 1559) Bu siyâsetde eder hafv-ı sipâh  
Vehm ider itmeye her kişi günâh
- 1560) Âhir itdi çü bu efsâneyi mâh  
Uyıldı dinleyirek kıssa(y)ı şâh
- 1561) Subha-dek yatdı çü irişdi seher  
Menziline yine gün gibi gider

BEZM - KERDEN-İ BEHRÂM ŞEB-İ CİHÂR-ŞENBÎH  
DER KÜNBED-İ SANDAL-FÂM

- 1562) Çâr-şenbih gicesi server-i ceys  
Sandalî kasra varur itmege ‘ayş
- 1563) Karşular vaht-ı şehenşâh-ı ‘Arab  
Kim ide ol gice şâh ile tarab
- 1564) Câme-i zerd ile ol zümre-i çîn  
Mehdeki peykere dönmişidi hemîn
- 1565) Za’ferânîler ile serv-i şehî  
Hurrem eyledi dil-i pâdişehî
- 1566) Sîm-i sâkındaki halhal-ı zeri  
Geldi deyü şehe virdi haberi
- 1567) Dâmenin devşirüp oldu çü revân  
Za’ferânında olur müşk-i demân
- 1568) ‘Âşıkâne geyüben şâh harîr  
Gün gibi çıkdı vü zeyn itdi serîr
- 1569) San gül-i zerd idi yanında nigâr  
Yüzine bakup olur şâh-ı hezâr
- 1570) Sanki dînârdaki nakş idi mâh  
Karşusunda yazılı peyker-i şâh
- 1571) Lâle-i zerd idi ol lâle-’izâr  
Oldı tâk içi anun ile bahâr

- 1572) Şenbelîd idi velî ‘ârızı gül  
Lâleveş câm elinde tolu mül
- 1573) Gül-i nesrîn idi yâ geydügi zerd  
Sürhu tâze ruhi ammâki çü verd
- 1574) Sîm idi gûy-ı zer-endûd teni  
Zeyn olur hayrı yele yâsemeni
- 1575) Geydügi pirehen-i zerd-i kabâ  
Cezb iderdi dili çün kâh-rübâ
- 1576) Saru Ya’kûb gibi mâhına hemân  
Tâc üzre yer ider şâh-ı cihân
- 1577) Reng-i behden nice renk ola laâîf  
Ki giye anı olan kimse karîf
- 1578) Yaraşur hûb olana saru libâs  
Gayrı renge anı eyleme kıyâs
- 1579) Döndi zerden düzili bir saneme  
Zerd idi bâ’is olur def’-i gama
- 1580) Pûşîş-i câm-ı zer u haddi nebîd  
Mey neşâtın zer-i zerd itdi mezîd
- 1581) Şâhı itmişdi hevâsı yarakan  
Döndürür la’le mey-i zerd hemân
- 1582) Yine mutrıblar ider sâzını râst  
Çaldılar kimi Hicâz u kimi Râst
- 1583) Mey-i asfer idicek devri çü mâh  
Germ olup şeh yine kec itdi külâh
- 1584) Tıflveş kec mec olur oldı zebân  
Ezilür dil-berine şâh-ı cihân
- 1585) Dizi üstine alup la’lin emer  
Geh kolun geh saçın idindi kemer
- 1586) Yeyüp içüp çün olur ‘ayş temâm  
İtdi pes bisterine şâh hırâm
- 1587) Oldı ‘üryân soyınup sîm-beden  
Koynı koltığı şehün toldı semen

- 1588) Sînesi yâsemeni berk-i semen  
Benleri sînesi üstünde peren
- 1589) Sarulur tek ol iki teng-i şeker  
Ki oradan suda itmezdi güzer
- 1590) ‘Arabî şîvelere başladı mâh  
Germ olur gâyet ana şîfe-i şâh
- 1591) Uyumaz gördi şehi zümre-i çîn  
Didi ey zîver-i dîhîm-i nigîn
- 1592) Bir nasîhat bize de itdi peder  
Nakl ideyüm sana ey ‘âli güher
- 1593) Şehlere didi gerek hilm ü vakâr  
Her kişi andan ider yoksa firâr
- 1594) Verme zinhâr gazab otına tâb  
Bagrum itmiye nedâmet ki kebâb
- 1595) Kûhda oldugiçün hilm ü vakâr  
Oldı sâbit-kadem ü tutdı karâr
- 1596) Âteşi olsa eyâ şâh-ı cihân  
Kendü kendüye ider kişi ziyân
- 1597) Hılm-ı hışm âteşine saçmasa âb  
Yana yakıla cihân ola harâb
- 1598) Hışm kılma olana sana zebûn  
‘Âkilun hışm olur hılme zebûn
- 1599) Bir kulun eylese bir kere günâh  
‘Avf vacibdür anun itme tebâh
- 1600) Lîk ‘âdet idine çünki günâh  
Farzdur anı ki tarayup ide şâh
- 1601) İtdüğün cürmleri eyle hisâb  
Yazsalar şübhe yok olurdu kitâb
- 1602) Birine itdi mi pâdâş-ı kerîm  
Sen de hilm öğrenüp ol nefs-i selîm
- 1603) Bir günâhuna eger olsa ‘ukâb  
Haşre dek olur idi sana ‘azâb

- 1604) Rahm kıl rahmet ide tâ ki Hudâ  
Kul beşerdür ‘aceb olmaya hatâ
- 1605) Yaptığı âyını hak itme harâb  
Diler isen sana itmeye ‘azâb
- 1606) ‘Aybdur şehlere bî-hûde kelâm  
Nâ-sezâ söyleme sakın çün ‘avâm
- 1606) Hokka-ı nûşa sakın koyma semi  
Şehlerün pâk gerekdür ki femi
- 1608) Yâve-gû olma virür kadre ziyân  
Hem mülevves olur anunla zebân
- 1609) Şefkat it halka ki şefkat bulasın  
Rahmet it halka ki rahmet bulasın
- 1610) Eyleme halka lisânunı sinân  
Söyleme kasd ile zinhâr yalan
- 1611) Eylemez kimseneden şâh çü bîm  
Kasd ile söylese kizb ola le’im
- 1612) ‘Afv olur çün siper-i hışm-ı Hudâ  
Eyleme olsa sezâ dahı cezâ
- 1613) Tûrş-rû olma çîn eyleme kaş  
Vaz’una dinmeye ta sîne-hırâş
- 1614) Meyl-i beşşâsa ider halk-ı cihân  
Halk bende idünür çerb-zebân
- 1615) Çün kılup eyleye latî’i nûfûr  
Şâhlıktan ne kadar ola huzûr
- 1616) Çekmedi kimsene sana nâvek-i kîn  
Kavsveş niçe kaşunda ola çîn
- 1617) Bâg-ı handana ider her kişi meyl  
Ârzû eyleye mi kimsene veyl
- 1618) Genc yerine neden ‘âleme renc  
Renc ile girür ele gerçi ki genc
- 1619) Bâg yerine neden dilleri dâg  
Merhem-i lutfunı kıl dagda bâg

1620) Zîr-i destün olana eyleme kîn  
Ki sığışmaz didiler kin ile dîn

1621) Kakıyup nice perişân olasın  
Dâyıma sührede şeytân olasın

### HİKÂYET

1622) Bir gün İskender-i Rûmî'ye meger  
Didi destûri ki ey fahr-i kemer

1623) Halka itdükçe şehensâh-ı kerem  
Olmaga başladı küfrân-ı ni'am

1624) Hılmdür bâ'isi terk eyle şehâ  
Halk senden ola kim korkar ola

1625) Şâhdan itmeye çün vehm-i sipâh  
'Âkibet hasmun olur taht u külâh

1626) Didi şol kahr ile olacak işi  
Hüner oldur ide lutf ile kişi

1627) Kılma Hak yapıdğı dîvârı harâb  
'Âkibet sen de olursun çü türâb

1628) Ölmegi her kişi kim eyleye yâd  
Bozulur olmuş iken hâtırı şâd

1629) Elün üzüne urup eyle 'itâb  
Her kişiye çün olur sûr u hîsâb

1630) Dem-i nâ-hak gibi olmaya günâh  
Saklasun her kişiyi andan İlâh

1631) Hîn-i 'arzunda bunun gibi kelâm  
Deme ırak bana yokdur ki rızâm

1632) Hayr işe eyle delâlet beni sen  
'Aybdur hem-dem-i sultâna fiten

1633) Didi neyliyyüm ey şâh-ı cihân  
Yaramaz oldu kaâi halk-ı cihân

1634) Karşuna bir kişi varmış idiler  
Görmeden yüzini dil nefret ider



- 1635) Müflis ü bî-edeb ü hâr u gedâ  
Bu söze söylemek olur mı sezâ
- 1636) Buyurun anı helâk eyliyeyüm  
Cigerün tîg ile çâk eyliyeyüm
- 1637) Bile mikdârını tâ mîr u fakîr  
Sanmaya kendüyi ‘izzet de hakîr
- 1638) Didi dîvâniye yokdur çü kalem  
Cenneti imiş ana itme elem
- 1639) Sevdüğünden beni bilmez ne diye  
Lâyık ola mı seven hadde giye
- 1640) Düşmen öldüğü yeter bana hemân  
Sevene daâi idelüm mi ziyân
- 1641) Aslı sevmege çıkar itme zarar  
Yoksa benden irişür sana hatar
- 1642) Hayra haml itdi halâs oldu fakîr  
Kaldı hayretde görüp hılmi vezîr
- 1643) Hılm şöyle gerek ey şâh-ı cihân  
Şâhdan itmiye tâ kimse gümân
- 1644) Böyle derken uyudu şâh-ı zemîn  
Bagrına basdı anı zümre-i Çîn
- 1645) Subh olıcak yine hûrşîd-i serîr  
Çıkdı dîvânına vü geldi vezîr
- 1646) Maslahat her neyise oldu temâm  
Vakf-ı ‘ayş oldu irişdi geh şâm

MECLİS-ARÂSTEN-İ BEHRÂM ŞEB-i PENC-ŞENBÎH  
DER KÜNBED-İ FELEK-FÂM

- 1647) Penc-şenbih gicesi şâh-ı cihân  
Lâciverdî geyüben oldu revân
- 1648) Oldı efrencî nigârın da enîs  
Devlet anun ola dil-dârı celîs
- 1649) Lâciverdî geyüp ol dahı harîr  
Zeyn ider hazret-i şâh ile serîr

- 1650) Lâciverdîler içinde anı şâh  
Göricek sandı tenün ebrde mâh
- 1651) Sûsen içinde açılmışdı semen  
Zeyn kılmış semenün gonce-dehen
- 1652) Hûblar karşusuna bağladı saf  
Ele sâzendeler aldı ney ü def
- 1653) Zeyn idüp meclis için sâgar-i zer  
İtdi ârâste nukli-y ile şeker
- 1654) Bezm işi bitdi gider yatmaga şâh  
Girdi koynuna yaturdı şehi mâh
- 1655) Geh öpüp geh kuçar iken anı şâh  
Didi lutf ile ki ey zıllu'llâh
- 1656) İtmiş idi bana bir pend peder  
Diyeyüm şâha buyurursa eger
- 1657) Şeh didi söyle eyâ gonce-dehen  
Hoş gelür her ne ki dersen bana sen
- 1658) Didi şâh olmayıcak 'ali-himem  
Hiç bi'at ide mi ana ümem
- 1659) Zer olur himmet ile hâk-i siyâh  
Cân virür himmet ile huşk giyâh
- 1660) Himmeti gör ki ider sengi güher  
Himmeti gör ki ider âki kemer
- 1661) Himmeti virdi hümâyâ dahı fer  
Yoksa her murgda var bâl ile per
- 1662) Himmeti 'âli tut ey 'âli-cenâb  
Sîvânun cân ile tâ şeyh ile sâb
- 1163) Himmet it bende-i makbûle müdâm  
Nâ-sezâyı ko olur ana harâm
- 1664) Himmet îmândan imiş var bu haber  
Bûriyâ himmet ile oldı şeker
- 1665) Hâcetin her kişinün eyle kabûl  
Yas idüp olmaya ta gönli melûl

- 1666) Kimseye kılma hakâretle nazar  
Düşmen-i dîne ola illa ki meger
- 1667) Himmet eylemeyecek halkına şâh  
Vire mi başını öninde sipâh
- 1668) Fikr idüp eyleyicek halka nazar  
Himmet için dürişür şâm u seher
- 1669) Yâs idicek kilimi kimse sana  
Haşrde rahmet idemezsin ana
- 1670) Hakka hıdmet bilenî halk sever  
Himmeti olmayanı kişi neder
- 1671) Yazamaz hokka dahı himmeti dîn  
Kim ider rûhını nefsine zebûn
- 1672) Himmet ile irüşür vâsıl-ı Hak  
Himmet-i tıfl gibi eyle sebak
- 1673) Şehlerün himmet şâhâne gerek  
İre maksûda çeken tâ ki emek
- 1674) Himmeti gör ki uçar evcde bâz  
Nesr cîfeyle sürer ‘ömr-i dırâz
- 1675) Ol feleklerde ider mürgi şıkar  
Buna cîfe yemek oldu ulu kâr
- 1676) Himmeti olanı Hak dahı sever  
Dîn-ı himmet kişiden Tanrı bezer
- 1677) Himmeti olmayan olur mu hemân  
Uluya nisbet ider rind-i cihân
- 1678) Bir hikâyet didi efsâne-minâs  
Yâd kıl etme fesâneye kıyâs
- 1679) Olmasun deyü sühan dürr-i telef  
Eyledi gûş Hudâvend sadef

#### HİKÂYET

- 1680) Çünkü İskender-i iklîm-küşây  
‘Âlemün fethiçün eyledi rây
- 1681) Fikr idüp bir nice gün oldu gamîn

- Agzını açmadı çün lâl-i nigîn
- 1682) Tonugup âyine-i gîfî-nümâ  
Hiç göstermedi bir kere safâ
- 1683) ‘Aklınun âyine fikr oldu sehâb  
Soramaz serin ider halk hicâb
- 1684) ‘Âkibet geldi Aristo-yı Hakîm  
Kâmil u fâzıl u üstâd u ‘alîm
- 1685) ‘İlm-i firdevs ola ‘imâl ola hür  
Haşre dek zehrûn ola meş’al-i nûr
- 1686) Olsa ‘âlemde ne denlû sürûr  
Getürür kalbe adın ol denlû fûtûr
- 1687) Bir gülî var ise bin hârî da var  
Kande kim genci ola mârî da var
- 1688) Nûş var gerçi ki nîşî dahî var  
Eskidür takî degül cây-ı karâr
- 1689) Gelmek ü gitmek olupdur çü bir an  
Gelmegi gitmegi bil anı hemân
- 1690) Teni terk eyleyüp ol cân ile mâr  
Döndi çarh budur resm-i kibâr
- 1691) Hiştur bu beden hâki hemîn  
Seyl-i âfet ider eczâ-yı zemîn
- 1692) Hâk-peş oldu ten-i hâki hemân  
Bu didügüme merâm oldu nişân
- 1693) Oldı gırbâl misâlinde tenün  
Âbdur ‘ömrünü fikr eyle senün
- 1694) Mîhmân oldu kişi bunda hemân  
Gitmedi her ki kim kodı nişân
- 1695) Kişinün çün kala makbûl eseri  
Söylenür haşr olunca hüneri
- 1696) Bir eser ola ki mislini melek  
Görmeye devr ideli çarh-ı felek
- 1697) Olmaya nazm gibi hûb-eser

- Lîk pâk eylemedür nakmı hüner
- 1698) ‘Âlem içinde bunun tâlibi çok  
Hikmeti gör ki velî vâsılı yok
- 1699) Kişinün olmayıcak tab’ı latîf  
Ola mı râm ana bu fenn-i şerîf
- 1700) Söz ‘arûsına virilmese cemâl  
Nazma kudret degül insâna kemâl
- 1701) Tab’u fitratda çün olmaya selîm  
Gedâ ile her ne dir ola sakîm
- 1702) Bile kadrimi bulan bunda kemâl  
Ola ma’lûm ki yok bana hemâl
- 1703) Görmedim hamse gibi hûb-kitâb  
Yok hatâsı zileli cümle savâb
- 1704) Minnet Allah’a didüm ana cevâb  
Her kişi gördi cevâbımda savâb
- 1705) Cânı yokdur ki bula ‘ayb-ı beşer  
Çeşm-i insâf ile eylerse nazar
- 1706) Geçeni ko gelicek dahı ‘adem  
Nazm bu nazmdurur dem de bu dem
- 1707) Şimdi yok bana bu fennim de hemâl  
Gerçi çokdur virilen ehl-i kemâl
- 1708) Bu sözüme dirisen lâf u haber  
Nazar et nazmûma ey ehl-i nazar
- 1709) Penc-genci çün nasîb itdi Hudâ  
‘Araba vü ‘Aceme cümle salâ
- 1710) Toludur genc ile bu penc- kitâb  
Kimsenün haddi degül buna cevâb
- 1711) Urayım şevk ile Şeh-nâme’ye dest  
Hasm ol kaldı idem anı da pest
- 1712) Yazayum Târih-i ‘Osmânî’yi ben  
Kıssası râstdur nazm-i hasen
- 1713) Anun efsâneleri oldu dürûg

- Yok cürâ'nda dürügun da fûrûg
- 1714) Bunlarun eyledüğü lîk cihâd  
Râst dur eyleyemez kimse 'inâd
- 1715) Eyliyeyüm anı bir hûb-kitâb  
Şâh-nâme'ye ola tâ ki cevâb
- 1716) 'Avn-i Hak ile idüp anı temâm  
Kılayum emrûme Firdevsî'yi râm
- 1717) Çünkü Hak'dan bana nazm oldu 'atâ  
Dil uzatmak bana gâyet de hatâ
- 1718) Dâd-ı Hak'dur bu cevâhir bana ne  
'Aybdur zîşt dimeklik hasene
- 1719) Nazmuma eyler isen lîk hased  
Di nazîrini bunu eyleme red
- 1720) Bulamaz kimse buna 'ayb u kusûr  
Ziştür dinse revâ ola mı hûr
- 1721) 'İlm çok olmasa bu 'ömr-i kasır  
Komatik olur idi asâr-ı kesîr
- 1722) Her birisinde yazup ben de kitâb  
Derc iderdüm nice redd ile cevâb
- 1723) Mefharüm sanma ki nazm ola hemîn  
Sinem içinde besâ genc-i defîn
- 1724) Nazmdan lîk murâdum bu hemân  
Beni unutmaya sultân-ı cihân
- 1725) Arturup itdügüm ol arz-ı hüner  
Ki ide bana 'inâyetle nazar
- 1726) Çü sever kâmilî ol ehl-i celâl  
Farzdur 'arz ide her bende kemâl
- 1727) Devlet ü 'ömrünü çok ide İlâh  
Haşre dek halka ola bâb-ı penâh
- 1728) Cehl olmamış idi sinn-i şerîf  
Ki temâm oldu bu ebyât-ı latîf
- 1729) Çü tokuz yüz on üçe irdi hisâb

Hamse hatm oldı vü ketb oldı kitâb